





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4785/A







Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4785/A





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4785/A




Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4785/A



4796  
m.  
(2)  
f. 9222

Dien Tractat  
PH. THEOPHRA-  
sti Paracelsi, beyder  
Arbney Doctoris.

1. De generatione hominis.
2. De massa corporis humani.  
Vormals nie in truck auß-  
gangen.
3. De secretis creationis. *Secunda editio.*




Cum priuilegio Cæsareo addecennium.

M. D. LXXVII.



PH. THEOPH. A.  
Hilf. atacell. copert  
Hilf. atacell. copert

1. De generatione hominis
2. De matris corporis humani
3. De foetui matris in utero
4. De foetui matris in utero



Compendio de la doctrina



Dem Ehrwürdigen Edel-  
len Herren Erasmen Newstetter/  
genant Stürmer/ Dechant zu Ehon-  
burg/ vnd Thumherm zu Wirz-  
burg/ meinem großgünsti-  
gen herren.

**E**hrwürdiger/ Edler  
Herz/ Was grosse  
freud/ lust vnd wol-  
fart der mensch ha-  
be auß betrachtung  
der Erschaffung aller dingen / ist  
mit wenig worten nit auß zuspre-  
chen. Dann wir glauben nicht al-  
lein / das der Gott / der Allmech-  
tig ist/ die ganze welt/ vnd alles woz  
darinnen ist/ auß nichts erschaffen  
hab/ Sondern der Gott / welcher  
durch seinen lieben Son/ das ewi-  
ge wort/ on welches nichts erschaf-  
fen ist / vns zum Vatter worden/

X ij



## Vorrede.

das wir nit allein herm vber alles  
was in den Elementen ist / sunder  
auch seines himlischen vnd vner-  
forschlichen Reichs theilhaftig /  
vnd miterben sein sollen.

Wiewol aber des menschen ver-  
stand / sinn / vnd vernunft / durch  
Adams fall verderbt / verfinstert /  
vnd dahin gerathen ist / das der  
größer theil der Menschen dieses  
arm / zergänglich / kurz leben vnd  
wesen / das wir hie auff erden ha-  
ben / sehen vnd fühlen / ewig begert  
zu behalten / vnd dem himlischen /  
ewigen / vnd vnvergänglichem /  
dieweil wirs nit für augen sehen /  
sundern glauben / am wenigsten  
nach trachtet : So haben doch die  
Christen von ihrem Herrn souil ge-  
lernet / das ihr wohnung alhie ein  
kurze



## Vorrede.

kurzezeit/ in seinem Reich aber ewig  
seyn soll / darumb die Christen den  
Articul der Erschaffung vnd auff-  
erstehung von den todten/ dardurch  
wir alles / was sterblich vnd zergenglich  
ist/ ablegen/ vnd ein vnzergenglich  
wesen annehmen / billich in höchsten  
ehren vnd wülden halten/ vnd ohn vnder-  
laß vnser Übung darinnen haben sol-  
len/ biß wir von hinnen zu ihm er-  
fordert werden.

Dieweil dann Theophrastus  
Paracelsus/ der hocherfaren vnd  
theur Philosophus / nit allein die  
secreta creationis in diesen dreien  
Büchlin herlich vnd wol tractie-  
ret/ sonder auch von der Auferste-  
hung des menschliche leibs Christ-  
liche meldung thut/ hab ich sie nit



## Vorrede.

lenger bey mir behalten/sunder of=  
fentlich in truck geben vnd verferti=  
gen wöllen/ damit menigklich sehe  
vnd spüre/wie vnbillich/vnnd mit  
vurwarheit Theophrasto zügemes=  
sen wirt / als wann er disen fröli=  
chen/tröstlichen/Christlichen arti=  
cul vnserß glaubens verleugne/ da  
man aber an dem ende des Büch=  
leins von heimlichkeit der Schöpf=  
fung / wie an anderen orten mehr/  
das widerspil sihet. Es verstehet  
Theophrastus diesen Articul an=  
derst nit / dann wie ihn Paulus zü  
den Corinthern beschreibet / wann  
Paulus daselbst vnrecht hat / So  
wöllen wir gern Theophrastu fal=  
len lassen. So aber Theophrasti  
lehrt mit dem heiligen Paulo zü=  
stimpt/ist leichtlich zü merckē/ auß  
wz



## Vorrede.

wz fundament Paracelsus allent-  
halben verkleinert wirdt. Dann  
am ende sagt er öffentlich / das die  
Erde die wir Menschen tragen/  
müß in den himmel kummen / wel-  
che ein andere form vñnd qualitet  
hat / dann die erd der 4. Elemen-  
ten. Darnach soll die Seel zu dem  
Görper kummen / sie erfreuen sich  
mit einander / sie bleiben bey einan-  
der. Dann darumb das der Spiri-  
tus weck ist / so wirdt das Corpus  
clarificiert / vñd nach dem Jüng-  
sten tag so wirt darnach ein ander  
wesen. Dann gleich wie Gott das  
fleisch Ade auß der besten substanz  
des limbi genommen / also wirdt  
Christus an dem Jüngsten tag auß  
vnserm verfauleten fleisch ein new  
fleisch vfferweckē vñ geben. So ist

X    iij



## Vorrede.

nun nicht der streit/ ob vnser fleisch  
am Jüngsten tag werde aufferste-  
hen / welches Paracelsus an vilen  
orten/ wie ein Christen gebürt/be-  
kennet/sunder de modo, wie/in w<sup>z</sup>  
form vnd gestalt es geschehen wer-  
de / da Paracelsus in ein anderen  
Büchlin sagt / daß das fleisch / so  
wir in das grab legen / werde der  
samen sein vnser<sup>s</sup> neuen fleisch<sup>s</sup> /  
das vns Christus geben wirdt/  
gleich wie es mit dem kornlin so in  
den acker geworffen wirt vnd ver-  
faulet/zü geht/da nit das kornlin/  
sondern auß dem verfaulten korn-  
lin ein newe frucht heraus wechset.  
Derhalben sollen die grossen Phi-  
losophastri/so von Theophrasti bü-  
chern vrteilen wollen / die Brillen  
auffsetzen / vnd dises hohen Teut-  
schen



## Vorrede.

sehen Philosophi scripta besser be-  
sehen vnd erwegen/ehe dann sie ih-  
ne verdammen.

Wiewol nun Paracelsus viel  
Herlicher mysteria erkläret in di-  
sem Büchlin/von den 4. Elemen-  
ten / von dem Menschen / den gü-  
ten vnd bösen Geistern/ 2c. So laß  
ich doch dieselbigen hie alle vner-  
zelet/dann das büchlin für sich sel-  
ber clar vnd verstendig ist.

Das Erst Büchlin de genera-  
tione hominis, wirt auch vngeta-  
delt von den Aristotelischen nicht  
bleiben / da er von dem Samen  
des Menschen philosophiert/was  
er seye / vnnnd wie er im menschen  
lige / Auch was für vndersehend  
zwischen den empfindtlichen vnd  
vnempfindtlichen Creaturen des  
Samens halben seye. X v



## Vorrede.

Zwar die Naturales müssen be-  
kennen/ quòd obiecta moueant sen-  
sus, diese speculatio so ex obiecto  
komet/machet ein fantasiam, durch  
welche der liquor corporis humani  
angezündet wirt. Disem liquori  
hat Gott die krafft geben / das er  
ein Samen werde / wann er ange-  
zündet wirdt / welcher sonst still im  
ganzen leib außgetheilet ligt / wie  
dann weitleuffiger dauon im Tra-  
ctat de spiritu vitæ, vnd anderen  
viel orten / vom Authore gemeldet  
wirt. Entlich / so nun der Samen  
durch die Fantasien gemacht / wirt  
er zu letst volkomen zu einem Gen-  
tro / da er in die formierung gehen  
soll / vñ von der anziehenden krafft  
matricis empfangen / &c.

Auß diser philosophia versteht  
wir



## Vorrede.

wir auch hell vnd klar die vrsachen/  
warumb ein mensch zorniger/gen=  
ziger/ıc. sey/dann der ander/wel=  
ches die Astrologi dem Eusseren  
Gestirn allein zulegen. Es hat  
aber Paracelsus dieses Büchlin  
von der geberung des Menschen  
nicht allein von wegen der eussern  
form vnd gestalt / wie es ein jeder  
Baur ansihet/beschreiben wollen/  
dann dasselbig nur Malerisch ist/  
vnd denjenigen so Abcontrasenter  
seind/zugehöret/sonder betrachtet  
ein mehrers. Damit aber dassel=  
big verstendlicher hat mögen für=  
bracht werden / hat er erstlich das  
ædificium vnd structuram ange=  
zeigt / wie es auffgerichtet vnd ge=  
bawen/Nachmals erkläret er das  
innwendig / id est, das Ewig/die  
Seel/



## Vorrede.

Seel/von welcher wegen der Leib  
beschaffen ist/vñ auch der Mensch  
Gottes bildnuß zu tragen gesagt  
wirdt / desßhalben wir Menschen  
auch von andern Thieren abgeson-  
dert vnd vndercheiden werden.

Die weil denn nun diser inwen-  
diger Mensch ewig ist Clarificie-  
ret / vnd der Eusser durch den In-  
nern geregiet wirt / nach der ver-  
nunfft/welches das Liecht der na-  
tur ist / beschreibt er des Inwendigen  
herkomen auch/vnd zeigt an/  
das zum ersten die Seel ewiglichen  
trage der Menschen bürde  
vnd freud / zum selbigen sey geben  
die vernunfft/ fürsichtigkeit/ vñnd  
weißheit / welche drey den leib re-  
girn vñnd ziehen sollen / damit die  
Seel nicht zuschwer trage. Disen  
sey



## Vorrede.

sey nun geben der Geist / das ist /  
der verstand / auß welchem die drey  
geregirt werden / vnd geht solches  
alles auß dem Liecht des Geistes /  
wie die Natur auß dem Liecht der  
Natur ist.

Solche oberzehlte nun nemen  
im Menschen von tag zu tag zu /  
je vnd nachdem der Lehrmeister ist /  
welcher das Kind zum verstand  
ziehen soll / damit es auß diesem  
Geist seine vernunft regieren mö-  
ge / c.

Im andern Büchlin schreibt er  
von der Massa corporis humani,  
das ist / von dem Samen in der  
Natur / das nemblich des Kinds  
natur von vier vättern entspringe.  
Erstlich von dem Vatter / zum an-  
dern von der Mutter / zum dritten  
von



## Vorrede.

von Elementen / zum vierten vom  
Gestirn. Von vatter vnd mütter  
empfahe es ein gleichförmige bild  
nuß vnd wesen / von Elementen  
sein speiß / sein tranck / sein wörme /  
seinen athem / auß dem Gestirn  
die sinnligkeit / das ist / das liecht  
der Natur. Dann der Geist im  
Menschen wirdt gleich so wol ge=  
speiset als der leib. Also zeucht der  
Mensch an sich durch seinen Geist  
den Geist im Gestirn / welche In=  
fluenz nun die sterckest ist / die ober=  
trifft im Kind / Vatter vnd Müt=  
ter / oder der Elementen / oder der  
Gestirn eigenschafft / oder wirdt  
ein vermischung durch einander /  
nach dem selbigē wirt der Mensch  
auch geberdet. Also ist der Mensch  
Microcosmus , das vatter vnd  
müter



## Vorrede.

müter seind auß der Welt gema-  
chet/

Nachdem ich aber der Freundschaft vnd genaigten willen/so E. E. mir zu Straßburg vor etlich Jahren erzagt/ noch nie vergessen/ So hab vnder E. E. namen ich diß Büchlin in offenen truck außgehn lassen. Erstlich das gegen E. E. ich mich danckbar erzeige/ Dann auch / das dises Argument E. E. von wegen ihres stands on zweifel für andere labores lieb vnd angem sein würdt.

Es ist wol zübedencken/dz Theophrastus heist inn diesen Büchlin weißheit lernen / vnd das er kein vergeben wort darinnen rede.

Ist demnach an Ewer E. mein ganz dienstlich bitt/ sie wöllē mein  
gütern



Dimo 1577.

Einmal in der Woche.

and / or other things.

**Dienstwilliger**

1870

only 10 inches M. Toxites D.

aus dem Jahre 1848

1891

Phil

1871. 27th June 1871.

... ..


18

Phil.



Phil. Theophrasti Paracelsi de generatione hominis

Vorrede.

 Wir nun philosophieren sollen de generatione hominis, wollen wir uns lassen ein Vorbilde sein einẽ vollkommenen menschen/ vñ vom selbigen erzehlen seine Proben/ das ist die meinung des nachuolgenden Capitels / des freyen Samens / wie er von ihm geboren wirt/ also ist er von seinem vatter auch geboren / vnd also hinder sich biß an Ersten. Wiewol also gebürlich were anzusehen vom ersten vatter aller prolium, weil aber derselbig nit geboren ist / das wir uns nicht gedenccken mögen/ sonder ein Geschöpf/ wollen wir hie vñser Philosophen von Empfengknusß des Kindes mit vnder spicken/ mit dem wesen des Geschöpffs / als vom geschöpf meldē/ das dann hie keinen bericht. Wiewol

A



vns auch zufallen etliche fürbildungen/  
die vns da bewegen zu Philosophieren/  
das mehr dann ein Vatter sey gewesen  
im ersten geschöpff der Menschen / Als  
ein besonder geschöpffter vatter der Mo-  
noculorum, ein besonderer der Gnomi,  
ein besonderer der Zwenfüßigen. Dann  
die Philosophj vermag nit/das ein zwen-  
füßiger vatter gebere einen Cyclopem,  
sonder das widerspiel also verstehn solt/  
Dann nur seines gleichen hanget an sei-  
nes gleichen/ vnd nichts vngleichen. So  
wollen wir auch die Argument lassen sein  
in seinem wert hie in diser Philosophen/  
vnd vns fürnehmen nach zugründen / zu  
erleutern den grund der geberung eines  
vom andern/ darbey wir erzehlen in mas-  
sen / wie das ein Empfengknüß der kind-  
er ist geordnet worden / vnd gesetzt von  
Gott.

Nun wollen wir vns fürnehmen die  
Zwenfüßige/euch zum Beyspil/vnd wie  
also die geburt der selbigen wire / also ist  
auch der andern Secten/die da nit zwen-  
füßig



füßig sein. Vnd wiewol der Secten in  
der form vil seind / so seind doch die form  
vnder vns getheilt / vnd die Natur in dem  
inwendigen wesen. Darumb aber zeigen  
wir auch die vrsachen / cur tinibos exem-  
plum proponimus, nicht darum / das wir  
einer solchen Secten seyen / oder daß sie  
vns mehr bedenckt ist dann die andern /  
oder darumb / daß sie den größten theil  
der welt besitzen / Nein / da keines nicht.  
Aber das ist die vrsach / das wir vns etwas  
gedencken / wie Christus ein zweyfüßiger  
mensch geboren ist / achten wir das die an-  
dern Secten nicht vollkommen in der form  
sein / sonder etwas bresthaftig / In der  
zweyfüßigen form nichts gebrist / wiewol  
am angesicht nicht abgehet denen die da  
monocul seind / vnd den Cyclopibus am  
lauffen nichts abgeht / Sonder allen an-  
dern Secten gleich in ihrem wesen / als  
volkommen gedенcken / vnd ihnen selbs wol  
gefallen / als die zwey füßigen / möchte  
doch da ein vnderscheid erfunden wer-  
den / daß sie beschaffen weren von wegen



der form / vnd nicht von wegen einer besondern Seelen / vnd weil auch das Leben vnd die vernunft in ihnen / nicht weicht / wie in den Zweyfüssigen / lassen wir sie auch der Ewigkeit mit lauffen / neben vns / vnd ihrem Ewigen keinen tadel in der form zuachten. Aber ein gewechs in der schöpfung zu sein / wollen wir nicht weiter reden. Damit vns ist zubedenckē / wie mißgewechs gewachsen in dem vermischten Lauff d Natur / als in der schöpfung der gleichen gewesen sein.

Damit aber vnser fürnemen nit weiter erlengert werde / wollen wir nach andern die anzeigung auch fürlegen / zu einer einfürung vnser fürnemens / vñ also die geschlecht vnd Secten der Menschen / in welchem das ewig ist / als wir erzelt haben / in vnderschiedligkeit der form / wollen wir lassen faren / vnd melden / das etwas im Wasser sey / das auch dz Ewige hat / vnd vns gleichförmig ist / als Meerwunder / oder ein ander gestalt / wie wir an vns haben / Dieweil wir spüren vnd erkennen



De generatione hominis.

S

erkennen / das im Wasser eine Welt ist/  
das vrsacht vns / das wir vnser welt nicht  
eine welt wollen nennen / sonder auß vrs  
sachen den vierten theil der welt. Dann  
es ist nicht zu widerreden / das in der Er-  
den auch ein welt ist / deßgleichen in dem  
Luft / vnd im mitteln himmel. Aber das  
wir hie in disem Libel von selben 3. mit  
lauffenden wolten vnser fürnemen dises  
Buchs nit zuritten / wollen wir von den  
dreyen weiter kein lehr halten / sonder al-  
lein für vns nemen derselbigen geburt /  
vnd ihrer kinder empfangnuß / vnd mit  
dem selbigen beschliessen.

Die empfangnuß dises volcks im er-  
sten vierteil der welt der Zwenfüßigen /  
wirt vns ein fürbild sein / Darnach so  
wollen wir auch anzeigen / daß die Em-  
pfindligkeit deren so im andern vierteil  
der welt / das ist / im wasser wohnen / auch  
ein andere Empfangnuß haben / auch  
ein andere im dritten vierteil der welt / in  
der Erden / die andere im Luft den vier-  
ten vierteil. In solchem lassen wir die

A iij



andern werck aussen bleiben / vnd vollfü-  
renden andern vierten theil in nachvol-  
genden vier Büchern / vnd die manig-  
faltigkeit ihrer form / gestalt / ic. vnd der-  
gleichen / wie sie dann in ihnen sein. Aber  
wie ein mißgewechs der schöpffung / wie  
wir denn vormals angezeigt haben / als  
ein mißrahtung in der Schöpffung ver-  
fahren vnd erfahren ist / also ist in allen sei-  
nen Samen. Dann es ist ein geschöpff  
wie ein mißgerahtens kind / darnach das  
gewechs ist. Wiewol dasselbige nit weit-  
ter seines gleichen gebüret / vrsach / es ist  
nit also beschaffen / noch also zur schöpf-  
ung / behelt die Form vnnnd die Natur  
nichts. Aber damit wir euch nicht ir-  
rig machen / wollen wir zu den vier Bü-  
chern eilen / vnd euch das vnderrichten.  
Darumb wollen wir ein anfang thun /  
vnd vom Geschöpff ein vnderricht zuge-  
ben / zu mehrerm verstand der nachvol-  
genden Capiteln / die da entschlossen wor-  
den sein vom Buch der Schöpffung / vnd  
die also / das vns etwas widerwertigs zu-  
gelege



gelegt vnd vnderworffen wirt/in dem/dz  
wir euch von der mißschöpfung thun/  
das wir reden vom Ewigen aller Form/  
so wir angezeigt haben/ der gleichen die  
vierten teilung.

## Liber de generatio- ne hominis.

**A**lso frey vnnnd ledig/  
ohne allen zwang/ hat  
Gott beschaffen den sa-  
men des menschen/ das  
er also still vnd verbor-  
gen im Menschen ligt/  
also/ das er desselbigen in keinerley weiß  
noch weg beschwert wirdt/ noch gezwun-  
gen. Vnd verstehend des menschen Sa-  
men also/ von welchem da geboren wurde  
das ander mensch/ das er gleich ist wie ein  
korn samen im Acker/ dasselbig ist so vil  
als tod/vnd stille/ ohn alle würckung/Al-  
so ist der ganz mensch ein Samen/ vnnnd

A iiii



in samlicher Wirkung todt / vñnd niche  
fruchtbar / also lang / biß ein zůsamen fű-  
gung da geschicht / als der acker mit einem  
Samen / Also sagen wir von geberung  
der Menschen / das nichts sey / das dann  
sey im menschen ein geberende krafft / vñd  
ein jedlich mensch / es sey Fraw oder  
Mann / ist ohne Samen / vñnd hat kein  
Samen in ihme. Vñd das wirt auff das  
geredt / das kein korn wechß ohne seinen  
Samen / kein baum wechß ohne seinen  
Samen / vñd dasselbige korn oder samen /  
von welchem alle gewächß wachsen / sein  
wesentlich in den Műttern / diese tragen  
vñd wirken in ihnen / vñd ist der Samen  
vñd das gewechß ein ding / Aber im mens-  
schen ist solches nicht / dann der Mensch  
keinen Samen hat in ihme / der in ihme  
wesentlich seye / oder in sein Natur gebil-  
det / oder mit seiner Natur vereiniget.  
Sonst in allen wachsenden dingen ist der  
Samen vereiniget mit seiner Műter /  
allein in den empfindlichen dingen nit /  
dieselben haben kein vereinigung im sa-  
men



men/mit ihrer Mütter / wie wir dann vor  
also angezeigt haben / das die geberung  
aller wachsenden gemeinwerdung zwey  
erley sen/ Als / eine da die Natur vnd der  
Samen in einem wesen seind / vnd das  
ander nicht / sonder allein das wesen der  
Natur ohne den Samen/ dauon wir ein  
weittern bericht wollen thun/ auß vnent-  
pfindtlichen geweehsen / was sie mehre  
vnd gebere/ vnd legen euch für ein Exem-  
pel von der geberung des menschen. Vñ  
das ist also.

Der Mann hat keinen Samen in jm/  
der da geberen möge seines gleichen / des  
gleichen die Fraw auch nicht. Darumb  
reden vnrecht die blinden vermeinten  
Arket / die da anfüllen grosse Bücher de  
Spermate, dann sie liegen das es sperma  
sen/ das sie dann sperma nennen. Damit  
wir aber nicht vnser Capitel mit densel-  
bigen blinden Paretels leuten volführen/  
vnd verlegen / wollen wir euch kürzlich  
zum Text führen vnser fürnemens/ Da-  
bey ihr endlich wissen solt / das gar kein

A v



Sperma sey weder inn Frawen noch inn  
Mannen / auff solchen grund heben wir  
vnsern Text an / 22.

Die beschribne anzeigung vollenden  
wir also : Gott hat allen dingen die da  
nicht ein empfindlichen Geist haben / ge-  
ben / das sie auß ihren selbs angebornen  
Samen sich selbs mehren / also / das in  
dem Samen die eigenschafft ist / vnd mit  
ihrer Natur wohnet / wechset / auff vnd ab-  
gehet. Als der Baum ist ohne krafft sei-  
nes samens nicht / sondern die krafft von  
welchem der baum wechset / ist alle zeit bey  
vnd in ihm / vnd ist von ihm nicht zu-  
scheiden / noch zunemen / Also auch in al-  
lem graß / korn / samen / 22. Aber solches ist  
in dem menschen nicht / der mensch hat  
allein die natur in ihm seines lebens / vnd  
was da gehört zu allen Instrumenten sei-  
nes lebens / darumb er dann auch zu ei-  
nem menschen erschaffen ist / vnd verord-  
net worden.

Aber der geist des Samens / der auß  
ihm einen andern mensch machen soll /  
der



der ist vnd wechset auch nit im jhme / er ist  
auch zugeben vnd beschaffen wie in beu-  
men vnd in andern gewächsen / also mag  
sich der mensch in dem nit erfreuen / noch  
beschweren / das er in ihm habe die sper-  
ma, sonder er lebt ohne alle sperma. Das  
solt ihr von vns also verstehen / das wir  
den grund eröffnen / daß das wesen des  
samens vnd der natur des mensche nicht  
mit einand beschaffen seind im mensche /  
sonder allein das wesen der Natur im le-  
ben / vnd zum leben / vnd nichts von der  
sperma mit ihm / 2c.

Wir gedencen vns kein grösser anlei-  
tung / denn der grossen thorheit der Irdis-  
schen güter / die ein vnergrüntes einwerf-  
en / also / daß wie das vnempfindliche ge-  
macht / also der vnempfindliche auch be-  
schaffen sey / Auff dise meinung zu glei-  
cher weiß / als sey der mensch wie ein  
Baum / vnd der samen in ihm wachs wie  
ein kraut. Also führen sie ein lehr / die mehr  
lachen als ein lehr genent möcht werden.

Ihr solt auch gedencen / alles das da  
gegen



gegenwurff werffe seiner beschaffung/  
das dasselbige ist ohne anhangenden sa-  
men/welches die vnerfarnen Arzet sper-  
ma nennen / so doch sperma kein samen nit  
ist/wirt auch zu keinem samen. Sperma ist  
ein reinigung d' Nieren / zugleich weiß  
wie der Rох der Nasen des Hirns reiniz-  
gung ist/ vnnnd das Schmalz der Ohren  
der Cholera. Darumb mich wundert / dz  
die vnuerstendigen Arzt sprechen/ wann  
der Rох in ein emunctorium der sperma  
außgieng/ es wer auch sperma, oder cole-  
ra, oder der stercus ramorum ist ein solch  
emunctorium, durch welches alle subtile  
so von vberfluß des ganken leibs außge-  
het/nicht gehörend zu dem samen/ sonder  
zur gesundheit des Leibs.

Damit wir aber nicht auß vnserem  
Text kömen / so merckend / daß dasselbig  
so die Arz sperma nennen / kein Samen  
ist / sondern wie gemelt/ ein Reinigung.  
Auff gemelte anzeigung wie wir den text  
angefangen haben/ das alles so für einen  
gegenwurff erkennet wirt / dasselbige ist  
ohne



ohne angeboren/ vnd on ein anhangen-  
den Samen/ solches ist allein im empfind-  
lichen geweß/ es hab die vernunft oder  
nicht / so hats doch die eigenschafft seines  
gegenwurffs / so weit vnd es desselbigen  
not ist / vnd diese not ist beschaffen von  
Gott / das die vnuernünftigen Thier  
verstehen den gegenwurff / vnd das ver-  
nünftige deßgleichen. Dise gegenwürff  
solt ihr also verstehn / das Gott in das em-  
pfindlich hat gesetzt ein freyen willen in  
ihrem Samen / also / das ein jedlich em-  
pfindlich Thier / so es will / mag den sa-  
men haben oder nicht/ vnd also hat er den  
selbigen in willen der empfindlichen thie-  
ren gesetzt / vnd sie damit weder bezwun-  
gen noch beschwert / wie dann ander ge-  
weß. Vnd wiewol der wille ein ver-  
nünftig geweßs ist / vnd vnuernünftig  
nicht / auß vrsachen / das der Mensch der  
der edleste ist/ darumb vnd er ein viech ist/  
das dem gegenwurff volgt / dann es hat  
die vernunft nicht.

Also wie wir nun angezeigt haben von  
gebes



geberung der menschen / solt ihr wissen / daz  
wir vnserem fürnemen wollen nach fah-  
ren vnd nachgründen / vnd lassen alle an-  
dere Thier faren / vnd solches sparen inn  
sein sonderes Büch. Aber vom menschen  
wollen wir fort fahren / das in der form/  
vnd sagen das / will er oder nicht / so hat er  
den Samen / dann Gott hat ihn also be-  
schaffen / viler vrsachen halben / welches  
hierein zu diser Philosophij sich nit reimē/  
das der Mensch also soll frey sein / lust ihn  
das er samen / & contra, vnd vngezwun-  
gen / das stand vnd sey / vnd vngenötiget/  
Wie dem aber sey / so lassen wir die rede  
faren / von wegen minder irzung / vnd er-  
zehlen den Text also in vnserem fürne-  
men / anfenglich / wie der mensch möge ei-  
nen samen machen / oder nicht / vnnnd be-  
schliessen mit dem / wie er seinen fürgang  
habe / vnd zum letzten / wie er wachz in sei-  
ner formierung.

Damit aber der anfang erkennet wer-  
de / wie der Mensch von Gott zum samen  
verordnet sey / nach seinem willen heim  
gesetzt



gesetzt / ist also. Gott hat dem menschen  
geben die Phantasien des Lusts vnd be-  
girden / das selbig hat er geben / das es zu  
einer Materij werd / dise Materij ist der  
Samen / dauon wir hie meldung thun.  
Damit ihz aber nun solches leichtlich vñ  
wol verstanden / so mercket also . So die  
lustig vñnd begirig Phantasien im men-  
schen vom menschen wirdt / vñnd gesetzt in  
seiner Speculation / gedenccken vñnd ver-  
hengen wil / jekt ist ihme der Samen ge-  
wachsen / aber nicht außgelassen / auch in  
keiner würckung nit / wie der Samen sein  
soll. Dise Phantasien des lusts wirt auß  
der Speculation / Dann Speculation  
macht ein Phantasien / endet vñnd formies-  
ret / dise Speculation nimpt sich auß dem  
gegenwurff / Als / wann ein Mann ein  
hübsche Frawen sieht / so gibts ihme ein  
gegenwurff vñnd vrsach seiner Specula-  
tion / vñnd so er auß seiner vernunft ge-  
denckt an die vrsach ihzer beschaffung /  
jekz verhenget er dem willen / vñnd mache  
ein Phantasien / das ist nun ein gegen-  
wurff



wurff dem menschen eines gegen dem  
andern / das jm die Phantasey macht/  
dann von ihm selbs mag er ihm die phan-  
tasen nicht machen / allein / er hab dann  
ein gegenwurff personlich oder phanta-  
senisch eingebildet. Dann also hat Gott  
die geburt des menschen erschaffen / das  
sie steht in beiden menschen / vnd ist je ei-  
ne dem andern eingebildet / der Mann  
der Frawen / & e contra. Also wirt in ih-  
nen beiden ein volkomene phantasey.  
Dann ein mensch hat allein nur ein hal-  
be phantasey / aber sie beyde haben ein  
ganke phantasey / dann also hats Gott  
beschaffen.

Dieweil nun die Phantasey ist eine  
Müter des Samens / vnnnd mit nichten  
die Natur des menschen / Ist darbey ge-  
nügssam zu verstehen / daß der Samen  
stehet in freyem willen des Menschen/  
vnd vil oder wenig / oder gar nicht / dann  
dieweil er den gegenwurff nicht hat / wie  
gemelt / hat er auch keine phantasey / auch  
kein Samen. Wie aber diser Samen  
also



also auß der Speculation des menschen  
wirt/solt ihr von vns also in den weg ver-  
stehn / vnd wissen das die phantasen den  
Samen macht/vnd nicht die Natur. So  
mercket / das Gott den liquoribus cor-  
poris hat die krafft geben / so der mensch  
ihn ankündet durch sein phantasen / das  
er ein samen ist vnd wirt/vñ ligt also still  
im gankē leib außgetheilt in einem men-  
schen / zugleich weiß wie ein holz das  
zum feur gehalten wirdt / so enkündet es  
sich/brendt vnd wirt ein feur darauff. Al-  
so auch die phantasen im menschen / die-  
selbig ist also von Gott erschaffen/das sie  
den menschen macht / wie sie ist / Ist sie  
zornig / so ist der gank leib zornig / ist sie  
geizig / so ist der gank leib auch also. Dar-  
rumb mit dem samen des menschen auch  
also züuerstehen ist / wenn der liquor vi-  
tæ ist wie ein holz in seiner natur/vnd die  
phantasen sein feur/das ihn anzündet als  
ein holz / als ein feur wie es predestiniere  
ist von Gott zü sein als ein samen. Das  
mit beschliessen wir diese rede / vnd sagen/

¶



das der gegenwurff die phantasen macht/  
vnd die phantasen den Samen / vnd die  
natur nicht.

Damit wir aber nicht vergessen / wie  
also der Samen vollkommen werde zu ein  
Centro/ da er dann soll in die formierung  
gehn / das ist also . Die Matrix ist von  
Gott geordnet/ also/ das sie Magnetische  
vnd Agsteinische natur vnd eigenschafft  
hat / an sich zu ziehen den Samen des  
Mans/ wie der Magnet das eisen an sich  
zeucht / der auch also von Gott darzu ge-  
ordnet ist. Deßgleichen wie auch der Ca-  
rabe auff Seiden. Dann wo die Matrix  
solche anziehende krafft nit hette / wurde  
sie nit schwanger/ vnd bekeme keinen Sa-  
men von dem Mann. Dise ansich zie-  
hende krafft matricis ist also. So ein frau  
formiert hat ihr phantasen / als bald ligt  
die formierung als ein vollkomener Sa-  
men auff ein theil in der Matrix/ vnd blei-  
bet nicht im leib/ wie im Mann / sonder  
kompt eylends in die Mütter / alsdann  
empfecht die Mütter durch die an sich zie-  
hende



hende crafft in jhz den samen des Mañs/  
vnd ist nicht lenger verhafftig / als ein  
mal / vnd also als oft ein neue phanta  
sey / also oft ein neuer Magnet / das ist  
die vrsach der Empfahung / so der Ma  
gnet zu solchen Magneten recht begrif  
fen vnd begeben wirt / also kompt der Sa  
men in die Mütter / vnd ist kein andere vrsach da. Darumb die phantasien beschaf  
fen sein zum gegenwurff / vrsach zugeben  
der phantasien / auff die meinung / darauff  
sie predestiniert ist / vnd alsdann / daß sie  
ihm als ein korn im acker gesehet vnd be  
halten / 2c.

Wie aber nun also der Samen in der  
Matrix ligt / so hat er sein fülle zu gerah  
ten oder nicht / Zu gleicherweiß wie ein  
korn im acker / das nicht frucht hat / so es  
nit gedünget wirdt oder ist / oder sunst nie  
genugsam gedünget wirt / Also auch dem  
Samen manig mal geschicht / das er ver  
ligt vnd verdirbt / auß vngesundheit der  
Mütter / das wir weiter in die Büchern  
der Arzney beuelhen.

W ij



Nach dem aber von der formierung zu  
reden / So wissend / das alle glider so im  
ganken leib seind / vom blüt vnd fleisch/  
gebein/geäder/ marck/2c. von einem jed-  
lichen samten außgehend / vnd ein jedli-  
cher samten / so sie in ein versamlet seind/  
vnd doch ohn erkentlich von einander/  
dasselbig hat sein würckung vff sein glid/  
als bein auff bein/ fleisch auff fleisch/ vnd  
als ein solches im ganken leib steht / also  
theilen sich die namen auß in der formie-  
rung/ auß krafft irer geschaffnen Natur/  
die also beschaffen ist von Gott / so sie in  
der Mütter ligt / vnd soll zum menschen  
werden. Dise samten im menschen wer-  
den beyder menschen in einem menschen  
versamlet / vnd welches menschen glieds  
samten vbertrifft in d' wachsung der form/  
also wirts demselbigen nachgeformiert/  
Vnd ob schon das kind den beyden nicht  
gleich sieht / vsacht die ganze einige ver-  
mischung beyder zusamen / die da gleich  
würcken/ daruñ ein mittel vnder in bey-  
den wirt.

Damis



Damit ihr aber verstehet den vnder-  
scheid der Kinder / was das sey / das ein  
Mann oder Fraw macht / wissend also/  
daß in der phantasey ligt / also / so die fraw  
in ihrer phantasey stercker gelidert ist deñ  
der Mann / vnd vester erkündet / der ma-  
chet ein Frawē. Also auch mit dem Mann  
zu verstehen ist / dann die stercke der phan-  
tasey ligt oben / vnnnd mögen nittermehr  
ein gleiche phantasey haben / sonder eine  
muß stercker sein als die ander / da wurde  
kein weg gefunden noch gemacht. Aber  
so etliche glider in leib ihren samen nicht  
geben / dieselbigen glider wachsen nicht  
am Kind. So aber auch ein samen zwis-  
fach felt / vnnnd fürnemlich / so einem alle  
samen zwifach fallen / werden zwey kin-  
der darauff / das ist allein die vrsach / das  
die samen vngleich fallen / oder verfallen /  
oder zwey vngleich samen zusamen kom-  
men / oder das eines glids samen zwifach  
felt / oder verkehrt felt an ein andern ort.  
Oder wann der haupt samen zwifach  
felt / vnd die andern all einfach / also wirt

B iij



da ein zwifach haubt. Aber wann da zwey kinder geboren werden an einander gewachsen / das die samen zwifach gefallen sein / aber nicht recht gescheiden von der Natur. Von solcher mancherley gebäre der Kinder were ein lange beschreibung zuthun / welche den verstandigen nit noth ist.

Wie nun also angezeigt ist die form der kinder / so mercket weiter von seinem wachsen / 40. wochen hat Gott dem kind in mütter leib zuwachsen gegeben vnd verordnet / vnd ein ziel gesezet / wie den Trauben vñ dem Weizen / das alles sein zil hat. Anfänglich hebt die Natur an zusehen vnd ordnen die Form / das ist / zu ordnen den samen an sein statt / da er dahin gehört. So nun solche ordnung geschehen ist / alsdann hebts an zu wachsen vnd zu stercken auff sein glid / also / das der samen der gebein bein wirt / der samē der geäder geäder wirt / 22. also biß ein jedliches glid steht vñ ist / wie es stehen vnd sein soll / das ist / also hört jek die Natur auff / vnd



vnd wircket nichts mehr im kind / verlest  
das gencklich in seinem wesen / dann vrsach/  
es ist volkommen ein kind / vnd die natur kan  
weiter nichts darauff machen / dann sie hat  
auff gewirckt. Demnach so kompt die genad  
Gottes / nachdem vnd der Gottheit zusteht / zu  
vollenden ihr geschöpff / das sie kompt an die  
ende / da sie hin geordnet ist / vnd gibt ihm  
das leben. Also lebt das kind / vnd wirdt je  
lenger je stercker / so lang / bis es ein solche  
sterck gewint / also / das es die Erd erleiden  
mag / vnd gedulden den Lufft der welt. Demnach  
so das ist / so ist die stund der gebeyrung /  
Also wirdt da ein Kind geboren / das dann  
zunimpt in der wachsenden Natur vnd  
eigenschafft.

Damit wir den vollkommenen menschen  
aber auch sehen / nicht allein das Kind /  
So merckend / das im Leben alle menschliche  
notturfft ligt / was zum menschen gehört /  
vnd so bald Gott dem menschen die genad  
gibt / id est, das Leben / so hat es die Seel /  
auch das gesicht vnd gehör / den

B iij



geist empfangē / 2c. vñ alles so ein mensch  
haben soll vnd müß / vernunft / weißheit /  
fürsichtigkeit / 2c. wie einem menschen zū  
gehört / aber alles schwach vnd blöd. Die  
selbige alle / wie sie dann in ihnen seind /  
wachsen auff mit der Natur / vnd je ster-  
cker die glider werden / je stercker werden  
auch die selbigen.

Damit wir aber nicht allein die geburt  
des menschen beladen vnd erschöpfen /  
wollen wir auch ein anzeigung thun vom  
stand der Menschē / nemlich / in was weg  
der Mensch gesetzt ist / mehr dann Kūh  
vnd Kalber / so vnser freund vnd vettern  
ziehen vñ melcken. Vnd zum erstē ein vn-  
derricht zū geben / soll vns ein solch für-  
bildung sein / das der mensch in ihm selbs  
nichts ist / dann das tödtliche das er hat /  
ist ein mensch. Darum ist ein mensch ab-  
solutē verstanden ein Kalb. Aber wir wol-  
len im terminō nicht ligen / sondern im  
grund / vnd reden vom inwendigen des  
menschen / welches das liecht des Men-  
schen antrifft / Also lassen wir stehn den  
mens



menschen in seinen gebrechlichkeiten / vnd  
zerbrechlichen dingen / so er an ihm hat.  
Aber das im Menschen ist inwendig et-  
was / das im Kalb nicht ist / dasselbig will  
sich gebüren vnsern gönnern fürzulegen.  
In diser philosophia wir den Menschen  
beschreiben / dann der Mensch vnd Kalb  
hat ein philosophiam, aber die Edleste  
philosophia ist das Ewig zubetrachten.  
Dann was nukt vns der Kalben gesicht /  
vnd der Hund wadeln? Oder was soll  
vom Aparat oder zütütlen verstanden  
werden? Dann es ist ein tödtliche vnd vn-  
gründliche philosophia am rechten tref-  
fen. Vnser fürnemen ist der Edlesten vñ  
höchsten philosophia nachzudencken / vnd  
mit nichten dauon abzustehn. Aber was  
ists das einen grund hat / vnd nicht das  
einen umbfallenden grund tregt / den die  
motten fressen? Ein meldung haben wir  
gethon / vnd euch fürgehalten / das wir  
das tödtliche so der mensch tregt an ihm /  
wollen fahren lassen / vnd allein nachden-  
cken das in ihm ist / vnd nit stirbt. Das

B v



selbig achten vnd halten wir für die höch-  
ste philosophia. So wir vns nun von  
solchen dingen zu schreiben vnderstehen/  
als nach einem geduncken / als der Logi-  
sten meinung ist / So ist not / vnd mehr  
denn not / das wir hie nichts anders be-  
schreiben / es were denn wol Confirmirt  
durch ewer lehren. Das wir vns aber ent-  
schuldigen / das wir dasselbig nit achten/  
ist die ursach / das vns ihre suppen vnnnd  
fleisch zuversotten ist / vnnnd gank ver-  
dempfft / als ob wir sprechen / gank ver-  
nichtigt in vnserm geduncken / groß sub-  
tile reden / vnd vil klüge subtiligkeitt seind  
bey ihnen / aber der weg so ihnen vor den  
augen ligt / ist gank vngelhobelt. So  
wir nun geduncken was der Stand des  
menschen sey / so ist dasselbige vns ein ehz  
vnd grund zu wissen / wo lügen vnd war-  
heit gemelt werden / vnd verstrickt ligen.  
Dañ der stand des Menschē ist allein ein  
wesen seiner kunst vernüfft / weißheit / ꝛ.  
vnnnd alles so die höhe der menschen an-  
trifft.

Damit



Damit vnd wir aber euch zu erleut-  
rung bringen / vnd damit mögen gewalt-  
tigklich philosophieren / vnd nit ansehen  
eines störrischen subtilen Schreibers lehr  
vnd gedicht / wie die fliegenden geister zu-  
fallen / wollen wir euch ein lauterem gü-  
ten bericht geben von des menschen vernunft / von seinen gedanken / weißheiten /  
ten / lehr / kunst / fürsichtigkeit / stand / 2c. vnd auch anzeigen / auß wem ein jedlichs  
forme vnd entspringe / alsdann bey diser  
lehr wir genugsam vernügt sein / mit dem  
grund der warheit / vnd mit der fliegen-  
den Lüfften der inwendigen corporum  
des tödtlichen leibs. Der ist aber der vn-  
tödtlich leib des menschen / demselbigen  
hat Gott geben sein vernunft / sinnlich-  
keit / weißheit / lehr / kunst / wesen / 2c. vnd  
alles was ober die tödtlichkeit ist. Dar-  
umb so ein mensch mit hochheit / weiß-  
heit / 2c. käme auß seinem eussern leib /  
dann alle weißheit vnd vernunft so der  
mensch gebraucht / dieselbig ist mit disem  
leib ewig / vn̄ als ein inwendiger mensch /  
so der



So der mensch mag leben / vnnnd nicht als  
ein außwendiger / dann solcher inwendiger  
mensch ist Ewig Clarificiert / vnnnd  
warhafftig / vnd so er dem tödlichen leib  
nicht volkomen erscheinet / so erscheinet  
ihm doch volkomen nach desselbigen ab-  
scheiden / Also / das so wir jetzt erzehtet/  
heißt lumen naturæ, vnd ist ewig / dassel-  
bige hat Gott gegeben dem inwendigen  
leib / das er durch den inwendigen leib ge-  
regiert werde / vnnnd das nach der Vernunfft.  
So dann alles das so der mensch  
thut / vnd thun soll / das soll er thun auß  
dem Liecht der Natur. Dann das liecht  
der Natur ist allein die Vernunfft / vnd  
nichts anders. Darumb der da will ein  
gerechter Arhet sein / muß auß seiner ver-  
nunfft / das ist / auß dem Liecht der Natur  
glauben vnd arzneyen / vnd nicht ohne  
das liecht / dann das liecht ist das / das den  
glauben gibt / Denn Christus will / das du  
mit deinem gewissen glaubest / vnd nicht  
ohne dasselbig / Vnd nicht ein gewisser  
glauben ist ein künner sinn / der Gott nicht  
ange



angenehm ist. Wiltu ein kunst brauchen/  
so brauchts nach dem Liecht der Natur/  
vnd nicht fliegend / denn Gott hat einem  
jeglichen menschen liechts genüg geben/  
darauff er predestiniert ist / also / das er  
nicht irren kan.

Ein grosses ist nach zutrachten auß  
dem Liecht der Natur / das Gott alles so  
der mensch thut/versihet in das liecht der  
Natur / also / das er nach der vernunfft  
soll leben/vnd nicht anders/dann die ver-  
nunfft ist im menschen / aber sein will ist  
brüchig vnd vnbestendig.

Damit wir aber beschreiben das her-  
kommen des Inwendigen menschen oder  
leibs/so mercket vns also/das alle Inwen-  
dige leib nur ein leib seind / vnd ein einis-  
ges ding in allen menschen / aber außge-  
theilt nach der wol geordneten zalen des  
leibs/ein anders denn den andern/vnd so  
sie alle zusamen formen/ ist nur ein liecht/  
nur ein vernunfft / also / daß wann wir  
volkomen leben wollen / so leben wir alle  
gleich in einer vernunfft/nicht in zweyen  
oder dreyen/2c.

Dar-



Darauff so wissend / das der Mensch  
so er empfangen oder geboren wirt / als  
wir Corporalisch haben / mit vollkommenem  
licht der Natur begabet ist / dieselbig ist  
des ersten tages wie des letzten / allemal  
volkommen in jhr selbs / darumb aber das  
sie unvollkommen erscheinet / vrsachet die  
schweche der zalen / vnd die ungewachsen  
ne stercke / so der vernunft gebüret zu ha-  
ben in seinen Instrumenten / darinnen  
sie ligt. Auff welches jhr mercken solt / das  
ein Kind keines ziehens bedarff zu der  
vernunft / dann sie wirdt ihme nicht ge-  
ben / allein zum verstand soll es gezogen  
werden / die vernunft hat es selbs / der  
verstand ist ein wissendliche vernunft /  
ist volbracht. Aber wie jhr gehört habe  
im forndern Capitel von dem Licht der  
Natur / So merckend das die Natur auß  
angeborenem wesen vom Adam vnd Eva  
her / ein angeborne vernunft / weißheit /  
vnd fürsichtigkeit hat. 22.

Dieselbige aber bededeut auff leiblich  
che / vnd nicht auff die Seelen / als zu ento-  
halten



halten den leib mit seiner vernunft/ vnd was zu ihm selbs zu auffenthaltten noth ist / dasselb kompt auß keinem Liecht des geysts/ allein der Natur/ das ist ein solche vernunft/ wie das Viech hat/ das seinen leib beschirmt / auch sucht was seinem leib not ist / auß dem liecht der natur/ von solchem liecht der Natur ist ein sonderliche fürsichtigkeit / dieselbig ist aber im leib/ vnd wirt auch im leib volbracht/ dergleichen ein sondere weißheit / dieselbig ist auch im leib / vnd bleibt im leib / dergleichen ein vernunft ist alda. Also wie nun angezeigt ist/ dasselbig alles leiblich / dasselbig lassen wir also faren vnd stehn/vn Tractieren vom Geist. Dieweil wir die Leiblichen beschriben haben / so wir müssen zu vnserm leib haben/ wie die selbige entspringt/ wollen wir nun fürbas erzehlen die nachgehende von Geistern/ darinn der stand des menschen ist/ wie ihz gehört hat/ daß dieselbige seind dem kind eingossen vnd gegeben. So mercket nun/ welches die eingegossnen seind. Als zum ersten



ersten die Seel / dieselbig treget ewiglich  
der menschen burden oder freud. Zum  
selbigen ist geben die vernunft / fürsich-  
tigkeit / vnd weißheit / dise drey sollen den  
Leib regieren vnd ziehen / also / damit der  
Seel nicht zuschwer das joch werde auff  
den hals gelegt. Zu disen dreyen ist gege-  
ben der Geist / id est, der Verstand / auß  
welchem die vernunft geregiet wirdt /  
auch die weißheit vnd fürsichtigkeit / auß  
disem ist die ordnung des lebens / vnd ge-  
het alles auß dem Liecht des Geists / wie  
die Natur / daß das liecht der natur ist.  
Wie nun also gesagt ist / so merckend / das  
der Mensch in der Sinnlichkeit / wie das  
Liecht der Natur außweist / vnd oben ge-  
meldt ist / daß dem selbigen liecht eintrag  
möge beschehen. Vnd das solt ihr also  
verstehen / das etliche eusserliche Geist  
sein / die dem Menschen geben lustigkeit /  
subtiligkeit / das ist / den fliegenden sin-  
nen / die da dienen zum lob / ehr / subtilig-  
keit / sinnlichkeit / vernunft / weißheit / fürs-  
ichtigkeit / ist nicht vom Geist noch lehre

der



der natur/ sondern von bösen Geistern/  
dieselbige alle ein wohn geben / ein wa-  
chende Phantasien / zu gleicherweiß als  
wenn ein mensch schlafft / vnd ihm träus-  
met / also wachend machen sie ein men-  
schen ein phantasien / vnd ein vernunft/  
vnd dieselbige dienet allein auff eigen  
ehz/ rñm/ vnd lob/ zc. vñnd dergleichen/  
wiewol sie nicht hinein gangen / so ist es  
doch ein Spiegel / in dem sich der mensch  
sihet/ darauff er nimpt ein lehr seines an-  
gesichts / sich selbs zu besehen / Als so er  
phantasiert / so begegnet der phantasien je  
gegenwurff von den Geistern / das sein  
phantasien da ein gegenwurff sihet / also  
dann was ihr liebet / das klaubets zusam-  
men / vnd zu ihr / aber in solchem ist das  
licht der Natur vnd das licht des Geis-  
tes nicht gewaltig / allein die phantasien  
ist meyster / die wirdt gesetzt auß phanta-  
sienischen gedanken in den gegenwurff/  
so ihr erschinnen wie ein traume. Also  
wie oben verzeichnet stehet/ solt jr wissen/  
das in 3. die ein anhangt / 1. im licht der

E



Natur / 2. von wegen des leibs enthaltung / 3. vnd im geist / als in den dreien / weißheit / fürsichtigkeit / vnd vernunft. Aber den leib zu regieren / demnach in sextis, als zum bestimpten eigen nutz.

Also hats Gott dem menschen geordnet / das ein mensch dem andern ein verstand gibet / vnd das wissen / vnd d' mensch den brauch derselben ihm selbs auß seinem liecht / das kompt auß der ursach / die weil der Mensch in der zellen nicht alle zeit ist volkomen / dasselbig ist mangelhafft in dem verstand vnd wissen. So hat Gott verordnet / das ein mensch das ander lerne vnd vnderweise im verstand vnd wissen / damit sein vernunft gehört werde. So aber einem jedlichen mensche die zellen vnd Instrument seines inwendigen leibs rein vnd volkomen weren / vnd keiner nicht mißgerahen / so dörffte kein mensch eines Lehrmeisters / denn ein jedlicher were ihm sinnreich genug zu speculieren / wissen / vnd erfahren / was sonst gelernet wirt / vnd besser / Aber die weil



weil dasselbig also wenig ist/ vnd die Instru-  
ment die vernunft verdunccklen/ so ist  
auch verduncckelt der verstand. Vnd da-  
bey wissen/ das im menschen der verstand  
vnd wissen ist ein ander Zell den die Zell  
der vernunft/ welchem die selb lautter  
vnd rein ist/ der ist ein vollkomener mensch.

Damit wir aber zum end nahen vn-  
sers fürnemens / wollen wir also erzeh-  
len / das Gott dem Inwendigen Men-  
schen hat geben alle kunst/ weißheit/ vnd  
vernunft/ so in das Ewig gehörig ist/ die-  
weil vnd es beim leben ist. So merckend/  
das Gott den leib/ wie wir gemelt haben/  
versorget hat / vnd also in drey volkome-  
ne stück gesetzt / vollkommen an ihm selbst/  
Aber noch mehr ist vnser himlisch zū-  
betrachten/ das ist/ der geist im Menschē/  
güt vnd böse Engel / die besitzung des  
Menschen/ vnd dergleichen.

Wiewol wir aber gesetzt haben drey  
geburten vñ auffwachsen des menschen/  
wollen wir jek sein statt/ darinn er stehet/  
zwischen der Erwachungszeit / vnd zers



brechung melden. So solt ihr verstehre  
zwo stund zu sein / zu betrachten das leib-  
liche so er hat / vnd auch das ewige so er  
hat. Auß den zweyen volgt hernach die  
auslegung / also. Das Leibliche auffent-  
helt das Ewige / zu gleicher weiß wie ein  
Wirt ein Gast aufferhelt. Aber wir wöl-  
len den Ewigen lassen fahren / vnd dem  
Leiblichen nachdencken / vnd dem also/  
das den leib auffenthalt / das ist das le-  
ben / welches allein Gott selbs ist auß zu-  
legen / vnd keinem menschen. Aber das  
Leben ist gesetzt in 4. ding / als in humo-  
res, complexiones, species naturales, vnd  
in die gaben. Die vier humores die seind  
die vier Säfte in medullis. Das wir  
aber der Natur der menschen nicht ver-  
gessen / als de Sanguine, Melancholia,  
Cholera, ic. ist gleich von ein Vatter/  
Müter/vñ Vatter ein Mittels kind. Im  
ersten Menschen ist alle vntrew gewe-  
sen / in der Frawen / daher ist die vntrew  
allen angeboren / vom ersten Samen her-  
ab gestigen / biß auff vns. In dem ersten  
men



menschen ist auch gewesen die Ernstligkeit / in der Frawen die Seligkeit / die warlosung / in Adam / die Erbarkeit / vns erbarkeit / die Fraw die Torheit eingebildet dem menschen die Natur / von seinem erblichen / von seinen Eltern.

Aber das der mensch Complexioniert ist / wie die vermeinten Arzet sprechen / Sang. Melan. Chol. Phleg. 2. 4. farben sein dem Menschen geben / in Adam 4. vnd in Eua 4. vnd seind doch nur einerley 4. als / braun / weiß / schwarz / vnd rot. In Eua lauter schön klar farben. Auß disen 4. farben entspringt einem jegliche menschen die farb seines leibs / als die Wag / wie er die berent / auff rot / weiß / schwarz / braun / 2. Im menschen seind auch die vier Complexiones, als Kalt / Feucht / 2. Solches nimpt also sein anfang. In Eua ist gewesen ein Complexion kalt vnd trucken / in Adam aber warm vnd feucht. Das sein nun die zwei widerwertigen Complexiones / aber auß ihnen ist das die vermischung noch 2. ges

E iij



boren. Also auß der drückne Eue vnd der  
hitz Ade ein Complexion entspringt/ tru-  
cken vnd heiß / Also auß der feuchte Ade  
vnd auß der kalte Eue / geboren von den  
zwo Complexionen Eue vnd Ade / noch  
zwo / in dem / so die hitz Ade hat vberwun-  
den die kalte Eue / vnnnd die drückne die  
feuchte alle vberwunden / vnd dergleichen  
das widerspil in ändern. Das aber ein  
mensch vil lieber stilet als der ander / ist  
die ursach also / dz alles Erbars in Adam  
gewesen ist / vnnnd das widerwertige der  
Erbarkeit ein Erbarkeit in Eua. Sol-  
ches ist auch alsdann die Wage herab ge-  
stigen in die Samen / nach dem ein jeg-  
lichs sein theil dauon gebracht hat / nach  
dem ist er in seiner Natur. Denn etwan  
hat die diebisch arth vberwunden / etwan  
die hürisch / etwan die spilerisch / etc.

Darum soll vns nichts kömmern die  
lehr vnd schreiben der vnwissenden vner-  
fahrenen Astronomen / die da solches alles  
den Sternen zulegen / vnd sich selbs dar-  
zulegen solten. Der Mensch ist ein Ge-  
schöpff



schöpff für sich selbs / also auch die Erd/  
Lufft/ 2c. keines hat das ander zu regie-  
ren noch zu treiben zu glück / der Monstes  
het frey / der Himmel / die Erden frey / der  
mensch braucht die Erden / die Erden  
auch den Himmel / der Himmel braucht auch  
die Erden. Der Himmel leßt sein vnflut  
auff die Erden / auch was in im zerbricht /  
der Mensch / dergleichen die Erden faßt  
es alles in sich.

Das wir aber vnser gesundheit vnnd  
franchheit nicht vergessen / wollen wir  
euch einfürung geben / das der Mensch  
dieselbige nicht ererbet vom ersten Sa-  
men / allein auß eigener irzung derer / so  
auß dem ersten Samen kömen / vnd ist da  
kein andere vrsach / denn allein / das alle  
ding von Gott in die zerbrechligkeit ver-  
ordnet seind / als de Conceptione gemelt  
wirdt.

Am ersten soll vns ein Argument sein  
auff die beschreibung der menschen zuse-  
hen / was da sey das sie treget / vnd was sie  
sich ernehren. Zum ersten solt ihr wissen /

E iiii



das vns die Erden tregt / vnd die Lufft /  
 vnd was auß der Erden wechß / dasselbig  
 ernehret vns. Diß aber ist den Nymphen  
 ein anders / dann sie gebrauchten sich we-  
 der des Erdtrichs noch des Luffts / Dar-  
 auff wir anfanglich ein Argument ein-  
 führen / was das sey das sie essen / darnach /  
 was sie leichtlich enthelte. Nun demsel-  
 bigen ein außtrag zuthun / ist das mein  
 Argument vom essen : Die Nymphen  
 sein die / dauon Christus sagt: Omnes ho-  
 mines qui non sunt de hoc ouili, sed ex  
 hoc mundo nostro. Nicht das wir die  
 anderen drey Welten wölten außschlies-  
 sen / sondern sie auch rechnen / das der  
 Schaff dreyerley sein / ohne vns / auß de-  
 nen nur ein pastor vnd ein Hirt. Darum  
 wir vns nicht bekümmern von den Büch-  
 schreibern / den sie heylig nennen / wie der  
 allein sey / 2c.

¶ Ende des Tractats de gene-  
 ratione hominis.

Von



Von der Massa vnd materia, auß den der Mensch gemacht ist worden.

**I**n sichs nun begibt /  
 das die eussern wesen so  
 gar gewaltig seindt im  
 Menschen / ist noth die  
 ursach zu erzehlen. Erst-  
 lich so wissend / das Got  
 anfanglich beschaffen hat alle geschöpff  
 im Himmel vnd Erden / Tag vnd Nacht /  
 alle Elementen / vnd alle Thier / vnd am  
 letzten da alle ding beschaffen seind ge-  
 wesen / vnd nichts mehr not ist gewesen /  
 da hat er den Menschen beschaffen. Nun  
 seind zwey da zu mercken in der Schöpf-  
 fung / Erstlich / das er alle ding auß nichi-  
 gen geschaffen hat / allein durch das wort /  
 allein den Menschen nit / den hat er auß  
 etwas gemacht / das ist / er hat in gemacht  
 auß einer Massen / die ein Corpus ge-  
 wesen ist / ein Substanz / vnd etwas von

E v



diser Massa ist zu reden / vnd dieweil zu  
verston also in den weg / Dieweil nun  
Gott von den dingen genommen hat ein  
Leib (auß dem er den menschen gemacht  
hat) so Gott in etwas auß nichts erschaf-  
fen hat / so ist die selbige massa gewesen  
ein außzug von allen geschöpfen in him-  
mel vnd erden / zügleicherweiß / als der da  
außzeucht von einem Leib die Seel / oder  
den Geist / vnd denselbigen leib verleist /  
als dann derselbig wirt gebracht den geist  
vnd die Seel / als noch ein Exempel / Der  
Mensch ist beschaffen in blüt vnd fleisch /  
noch ober das ist in ihm ein Seel / die ist  
der mensch / allmal ein subtilers dann das  
erst ist. Nun in solcher gestalt ist auß zo-  
gen auß allen Creaturen / allen Elemen-  
ten / allen Gestirn im himel vnd auff erd /  
von allen eigen geschaffen wesen / natur /  
auch wandel / 2c. das jenig das am subti-  
lesten vnd besten gewesen / ist züsamen ge-  
zogen in ein Mass / auß der massa ist der  
Mensch gemacht. Auß dem nun volget /  
daß der Mensch ist die klein Welt / das ist  
Micro



Microcosmus, auß der ursach / daß er die  
ganz welt ist / in dem / dz er ist ein außzug  
auß allen Sternen / Planeten allen / auß  
dem ganken Firmament / auß der Er-  
den / vnnnd allen Elementen / vnd ist das  
fünffte wesen. Dann die vier Element  
seind die ganze welt / vnd der Mensch ist  
auß ihnen gemacht / darumb ist er auß der  
zahl der fünfft / das ist / das fünfft Wesen /  
außerhalb den Elementen / ein außzug  
von den vieren / vnd der kern von den vier-  
ren / vnd allein in dem ist der vndercheid  
zwischen der grossen welt vnd dem micro-  
cosmo, zwischen den Elementen vñ dem  
fünfften wesen / dz der Mensch in ein anz-  
der Form / bildnuß / gestalt vnd substanz  
geordnet vnd geschaffen ist / also / das sein  
Erden im menschen fleisch / sein Wasser  
ist blüt / sein Feür ist sein werme / Luft ist  
sein Balsam. Vnd aber wiewol die Ei-  
genschaften nicht verendert seind / allein  
der leib in seiner Substanz / darumb ist er  
ein Mensch / vnd nit ein Welt / geschaffen  
auß der welt / nicht nach ihr gebildet / son-  
der



der nach Gott geformiert / aber in ihm  
seind alle der welt Eigenschafften bliben /  
vnd die hat der Mensch in ihm / darumb  
sie in der Geschrifft wol ein staub vnd pul  
uer genent seind worden / äschen seind  
wir / vnd zu äschen werden wir / das ist so  
vil geredt / Ob schon der mensch in Got  
tes bild geschaffen ist / vnnnd hat blüt vnd  
fleisch / vnd ist nicht wie die welt / sondern  
mehr denn die welt / vñ Regiert die welt /  
nicht dest minder so ist er am ersten ein  
staub vnd äschen / das sol er betrachten /  
das er sich sein Figur nit laß verfűeren /  
sonder gedenc̃ wer er ist gewesen / vnnnd  
jetz ist / vnnnd er das wider werden muß.  
Darumb so mercken auff die Exempel /  
Dieweil nun der Mensch nichts anders  
ist / denn gleich eben das / dz das war / auß  
dem er gemacht ist worden / vnd sich die  
Bildnuß nit verfűren lassen / das solches  
so weit reicht vnd langt / das er dises muß  
bekennen / das er nichts ist als ein mas  
sa, auß der grossen Welt gezogen / als  
menschlich. Dieweil vnd er der ist / die  
weil



weil muß er sich von der selbigen führen/  
 erhalten / vnd sich führen / als durch dise  
 Exempel bewisen wirdt / Sein leib ist  
 auß der welt / darumb so muß er auch von  
 der selbigen welt / auß der er ist / erhalten  
 werden / vnd erfüret. Darumb so volgee  
 auß dem / das sein Brot auß der erden  
 wachset / sein Tranck auch auß der erden  
 wachset / vnd also seine Nahrung / vnd die  
 groß welt muß die klein welt speisen vnd  
 führen. Wer der mensch nit auß der große  
 sen welt / sonder wer auß dem Himmeli / so  
 esse er auß dem himel das Himmelsbrot mit  
 den Engeln. Aber er ist auß der Erden /  
 auß den Elementen / darinn muß er sich  
 durch dieselbigen erhalten / vnd dieweil  
 er ohn die groß welt nit sein mag / sonder  
 ohn sie ist er todt / darumb so ist er wie die  
 groß welt / nur staub vnd äschen.

Auff das nun so wisset weiter zu sehen /  
 das auß den vier Elementen der mensch  
 sein leib enthalt / von der Erdē sein speiß /  
 vom Wasser sein tranck / vom Feür sein  
 wärme / vom Lufft sein athem. Also wurde  
 der



der mensch in sein leib erhalten/aber solches alles ist allein zum leib geben / fleisch vnd blüt zu enthalten. Nun ist der mensch nit allein fleisch vnd blüt / sonder es ist in ihm die Sinnligkeit / dieselbig kumpt nie auß den Elementen / aber die Complexion wol/ die Sinnligkeit entspringt auß dem Gestirn / Nun ist das Gestirn also von Gott beschaffen/ das es alle Thierische weißheit/ vernunft/ geschickligkeit/ vnd alle künst/ so zu den Menschen gehören/ die seind im Gestirn/ vnd der mensch hat diß alles vom Gestirn/ dasselbig heist das Liecht der Natur/ was die Natur findet. Ein Exempel: Der leib des menschen nimpt von der erden sein speiß / in der er geboren ist/ nach seiner Concordanz / darumb einer lust hat zu der speiß / der ander zu der/ der zu der/ ein jeglicher sauget auß der erden sein wollust / wie auch die Thier thun/ in ihrem leib saugt vnd sucht ein jedliches sein angeborne speiß vnd tranck. Also wie nun der mensch in sein leib sein eigenschafft/ sein blüt vnd fleisch  
der mas



der massen zu verhalten / also ist auch mit  
 der Sittligkeit zu verfahren / da der mensch  
 sein Sinn auch dermassen speisen vnd  
 trencken muß / aber nit von den Elemen-  
 ten / dann die Sinn seind nicht leiblich/  
 sonder ein Geist / vnd das Gestirn ist  
 auch ein Geist. Also zeucht der Mensch  
 an sich / durch sein geist / den geist im Ges-  
 tirn / in dem er empfangen vnd geboren  
 ist / denn der Geist im Menschen wurde  
 gleich so wol gespeist als der leib / dann  
 da ist ein solche eingeborne artz bliben in  
 der Schöpfung des mensche / ob er gleich  
 wol in Göttlicher Bildnuß ist / jedoch a-  
 ber nit in Göttlicher speiß / sunder in den  
 Elementischen. Vnd ist getheilt in zwen  
 theil / in den Elementischen leib / das ist  
 in blut vnd fleisch / darumb auch gezwun-  
 gen / von dem selbigen leib sich zu erneh-  
 ren / vnd in dem geist / auß dem geist des  
 Gestirns / darumb er auch gezwungen  
 wirt / auß dem geist des Gestirns seinen  
 geist zu ernehren / denn staub vnd aschen  
 ist die welt / der mensch auch / darumb so  
 ist der



ist der Mensch / der von der grossen welt  
die Elementen vnd das Gestirn / wie ge-  
melt ist / haben muß / vnd das darumb / das  
er noch dasselbig ist.

Nun ist noth auch zu wissen von der  
Empfengnuß der Menschen / wie der  
mensch gemacht vnd geboren wirt / Vnd  
das also. Der erste Mensch ist gemacht  
worden auß der Massa, so außgezogen ist  
von der ganzen machina mundi, Wei-  
ter ist auß ihm sein Fraw gemachet / die  
im mit der welt gleich auß vergleicht ist /  
Zes forthin auß dem Mann vnd Fra-  
wen seind die gebernus der Kinder / vnd  
aller menschen. Nun wisset aber / die hand  
Gottes hat den ersten Menschen gema-  
chet / vnd wunderbarlich in sein Bild-  
nuß / vnd in blüt vnd fleisch / das er ein  
mensch ist. Weiter aber / ist der Mensch  
vnd sein Fraw der Natur vnderworffen  
worden / von der hand Gottes kommen /  
vnd nimmer ein wunderwerck durch die  
hand Gottes / sondern durch die Natur /  
vnd also der Natur die Menschwerdung  
befol-



befolgen / vnd in ein Massz verordnet/  
auß der er kommen ist / welche Massz der  
Samen in der Natur geheissen wirt.

Nun wissend auff solches / das Mann  
vnd Frawen allein den Menschen niche  
möge machen / sond sie zwey / die Elemen  
ten / vnd der geist des Gestirns / die 4. mas  
chen ein Menschen / des samens ist nit im  
menschen / dann was Elementisch in ihn  
kompt / vñ wo die Elementen nit wirken  
in der empfengnuß / so wirt kein leib da /  
was aber ohn die Elementen wirt / vnd  
ohn den geist des Gestirns / dasselbig ist  
ein mißgewechs / ein fluß / vnd ein gar vn  
natürlichs. Vnd zu gleicher weis wie  
Gott die Massz genommen hat / vnd das  
leben eingossen / also muß die Composi  
tion in ewigkeit gehn auß den 4. vnd auß  
Gott / als der / in des hand alle ding steht /  
Würckt das Gestirn nit / so wirt kein geist  
darauf / da sein der Leib vnd der Geist /  
dann die zwey geben im Menschen / das  
der mensch den Samen / Man vnd Fraw  
das kompt von aussen hinein / zu gleicher

D



weiß/wie die narung/ die hat der mens. in ihm auch nit / er muß vnfelich in sich bringen/ als sein trüncklin / Wie also mit der speiß ist / vnd mit dem tranck / also ist es auch mit der Sperma, die wirckt eusserlich im mensche die Elementen zum leib/ als ein Mass / das G. stirn durch seinen geist also die sinn des menschen/ vnd vatter vnd mütter seind die werckzeug der eussern / durch die es vobracht wirt. Als ein Exempel / In der erden wechßet nichts/ es sey dann daß das ober Gestirn sein krafft darzu thū. Nun was ist das? solche krafft ist souil/ das keins ohne das ander sein mag/ sonder je eines muß mit dem andern wircken. Dieweil nun eusserlich/ also auch im menschen.

Auß dem folgt nun/ dz der erst mensch wunderbarlich gemacht ist worden / vnd ein werck Gottes ist. Weiter ist der Mensch der Natur vnderworffen/ mit sampt der Natur seine kinder zū geberen/ vnd die Natur ist die eusser welt in Elementen



De Massa corp, humani.      51

menten / vnd in Gestirn. Auß dem fol-  
get nun / das die Elementen ihren lauff  
vnd operation haben / das Gestirn auch  
im täglichen lauff / also lauffen sie beid  
in der gleichen Concordanz / vnd alle au-  
genblick ein ander wesen. Auß dem fol-  
get nun / so die würckung vatter vnd müt-  
ter mit diser Concordanz ist ein empfeing-  
nuß / so empfecht das kind die Natur de-  
ren / von dem es geboren wirt / das ist / von  
den vier vättern / nemlich / von vatter vnd  
müter / von Elementen / vom Gestirn.  
Von vatter vnd müter ein gleichförmige  
bildnuß vnd wesen / blüt vnd fleisch / vnd  
darzu auß jr Imagination / die dann das  
gestirn im menschen ist / empfacht es auch  
ein Sinnligkeit / nach dem die Concor-  
danz vnd Constellation gewesen ist / also  
von den Elementen die Complexion vnd  
die Qualitet seiner Natur / also auch von  
dem eussern Gestirn ein Sinnreiche.  
Wie nun in dem allem / welche Influenz  
die sterckst ist / vbertrifft im Kind / vatter  
vnd müter / oder der Elementen / oder der

D ij



Gestirn eigenschafft / oder da wurde ein  
vermischung durch einander. Also ist  
der mensch der Microcosmus, das vatter  
vnd mäter seind auß der welt gemacht/  
vnd die welt hülff für vnd für die mens-  
schen geben / vnd also ist da ein leib / aber  
zwo Natur / ein geist / aber zwen Suger /  
Zum letzten kumpt der leib in sein ersten  
leib / die sinn in ihren ersten sinn / sterben  
vnd gehen ab / gehn hin / vnd komen nim-  
mer wider. Dann ein äschen mag nicht  
wider in holz werden / also der Mensch  
mag auß dem das er ein äschen ist / nicht  
wider ein Mensch werden.

Nun ist die geburt der Menschen dar-  
rumb angezeigt / als ein gerechte vniuers-  
salische Probation der Astronomen / also /  
das hierinn verstanden werde / warumb  
der Astronomus den Menschen erkenne  
durch das gestirn / Als nemlich darumb /  
das der mensch durch das gestirn / zu glei-  
cher weiß wie ein jedlich kind durch sein  
vatter erkent wirt / also auch an dem ort.  
Vnd das ist ein grosse nutz bare kunst / so  
der



der Mensch weiß wer er ist / auß dem him-  
mel / auß den Elementen / auß vatter vnd  
mütter. Erkentnuß von vatter vñ mütter  
ist stirpisch / erkentnus auß den Elementen  
ist Arzneyisch / erkentnuß von dem  
gestirn ist Astronomisch. Darumb solche  
erkendtnuß nuß vnd güt seind / seind vil  
vrsachen. Dann mancher ist Thierisch /  
der sich selbs für Englisch außgibt / man-  
cher redt auß Martha / der sich selbst daß  
Samuelem vñ Mahalim nennet / man-  
cher bett vnd fastet auß der irdischē Con-  
plexion / vnd nennet sich ein Geistlichen.  
Vil seind solcher dingen / die nit herkom-  
men von dem sie zů können fürgeben wer-  
den. Der ein Astronomus ist / der weißt  
weß geist redt vnd gesehen wirdt. Aber  
noch ist das zů beklagen / das die jenigen /  
so zwischen beiden Liechtern nider sitzen /  
von beiden Liechtern Rauben / damit sie  
gesehen werden / ist nit minder / beid geist  
werden verstanden / aber in ein frembden  
geist / der nit sein soll. Wie aber dem al-  
lem sey / so ist der Mensch ein werck Gotz



tes/vnd aber nur einer ist sein Son/nemlich der Adam / die andern seind der Naturkinder / als auch Lucas beschreibet in seiner genealogia vom Joseph / der da war ein Son Heli / vnnnd derselbig Heli ein Son Mathat / der Mathat was ein Son Leui / vnd also hinder sich je einer des andern Son/ vnd keiner Gottes/bis Adam allein. Darumb so ist der mensch in der Natur ein Son / vnd verlest sein geschlecht nicht / sonder schlecht in sein vatter vnd mütter der Gestirn/der Natur vatter vnd mütter / der Gestirn vnd Elementen / erkennt auch vatter vnd mütter/ des fleisch vnd bluts derselbig ist / der da gewalt hat zu reden / von dem kumpt sein wandel/wesen / vnd eigenschafft/ vnd alle arth.

Vnd gleicherweiss wie ein Arzht zusamen nimpt alle arznei in eins / vnd machet allen ein Arzney / die ohn ein solche zal nicht mocht dergleichen werden/ Also hat Gott sein wunderwerck noch grösser gemacht/ vnd den Menschen in ein Composition



position bracht / all aber Elementen vnd  
 Sydera / also / das er selbst der himel ist/  
 selbst das Firmament / selbst die Elemen-  
 ten / vnd selbst in alle Natur der ganzen  
 welt / in einem kleinen Körper begriffen  
 vnd verborgen. Vnd wiewol das ist / das  
 Gott den Menschen auch wol het mö-  
 gen machē auß nichts / mit dem wort fiat,  
 ist aber nicht beschehen / sondern er hat in  
 in die Natur beschaffen / vnd auß der Na-  
 tur / vnd in die Natur gelassen / vnd ihn  
 der Natur vnderthenig gemacht / als ein  
 kind / vnd die Natur ihm auch vnderthe-  
 nig gemacht / aber als ein vatter. Darauff  
 dann fleußt / das der Astronomus durch  
 den vatter des Menschen enthaltnuß  
 derselbig erkent wirt / vnd auß dem vol-  
 get auch / das auß der Natur dem men-  
 schen durch den Arzet auch geholffen  
 wirt / also / als wañ ein vatter seinem kind  
 in nöthen hilfft / so es in graben gefallen /  
 als die Natur dem Menschen vnderthe-  
 nig zu helffen / als ihrem blüt / als ihrem  
 kind / als ihrer frucht / die von ihr geboren

D iij



56 The. Par. de massa corp. hum.

wirdt im leib der Elementen / in dem die  
francckheiten ligen / vnd im leib des geists /  
wie dann die Sinnligkhey vnd vernunft  
ligen / die Elementen durch arznei / die  
Bestirn durch ihr kunst vnd weißheit.  
Aber solches alles / dieweil solche weiß-  
heit nichts ist vor Gott / sonder die Gött-  
liche weißheit geht für all auß / so theilen  
sich die namen da der weißheit / die auß  
ihz natur wirt Thierisch geheissen / dann  
sie ist tödtlich / vnd die auß Gott wirdt es  
wig geheissen / dann sie hat kein todt in  
ihz. Also hat mich güt gedaucht / die zwey  
stück für zūhalten / ehe vnd ich in der As-  
tronomien handle / damit der grund alle  
zwo gemeine probationes in allen  
gefunden werde.

Ende des Tractats Theophrasti von  
geberung des Menschen.

D v



57  
Philipp. Theophrastus  
Paracelsus de Secretis  
Creationis.

Das ist/  
Von heimligkheit der  
Schöpfung als  
ler ding.

**I**n dem Namen der  
heiligen Dreyfaltigkeit/  
Gott des Vatters/ vnd  
durch die vberflüssige  
vnbegreifliche Weiß-  
heit Gott des Sohns/  
vnd durch die grosse liebe des Heiligen  
Geistes/ Amen.

Seid der zeit da Gott der All-  
mechtig Adam schüff / biß auff dise zeit/  
so ist mancher hochgelerter Mann / Hei-  
den vnd Christen/ durch die gnad Gottes  
des heiligen Geistes erleuchtet worden/  
Als / das die Heidnischen Meister vnd  
Philos



Philosophen wol bekendt haben / vñ vns  
in ihren Schrifften gelassen / Das wir  
Christen von rechts wegen höchlich sol-  
ten anmercken / vñnd vor augen haben/  
das welches sie vns geschriben haben / wie  
das die Heimligkeit vñd Weißheit aller  
dingen vñd Künsten / sein gaben Gottes/  
vñnd niemand mag solche haben / dann  
wem sie Gott gibt / von welchem vrsprüg  
vñd Fundament ihrer lehrung vñd schriff-  
ten der alten Weisen / vns nicht genüg-  
sam vñd woluerstendig geschriben haben/  
Dann allein durch ihre scharpffe sinne/  
vñd mit verborzenen langen reden / in  
Figuren vñd gleichnussen / das nicht wol  
müglich etwas recht zu verstehen / hie in  
Disem finstern thal der threnen / biß auff  
die zeit der Gnaden / auff die fürsich-  
tigkeit Gottes des Allmechtigen / die vns  
künden ist / das warhafftige liecht Ihesus  
Christus / welches ein jeglichs mensch er-  
leuchtet / so in dise welt kummet / in wel-  
chem menschen / Gott der Allmechtig die  
grosse heimligkeit aller heimlichkeiten / in  
vns



vns seinen natürlichen vnd begreiffenli-  
chen Creaturen/ganz vnd allermeist ver-  
borgen geschaffen hat. Darumb ist vns  
Christen menschen alles wol möglich/  
alle Göttliche heimlichkeiten zu verstehn/  
so fern wir vnser sinnligkeit darzu wollen  
schicken/ vñ Gott vmb seine gnad bitten/  
dann so ist er gütwillig vnd bereyt vns zu  
geben. Dann er vns dazu geschaffen hat/  
das wir seine ehr vnd glori sollen vermeh-  
ren / vnd zu aller zeit ihn bitten vñ an-  
ruffen / vmb solche seine gnad vnd weiß-  
heit. Dann alle weißheit kummen von  
Gott / vnd ist bey ihm kein ende/ dann er  
ist die höchste vnd dieffeste aller Künsten  
vñ heimlichkeiten / als dann die alten  
Heidnischen Meister vnd Philosophen  
in ihren herken bekennet / das sie vns in  
ihren schriften offenbaret haben / wie sie  
hie den menschlichen Creaturen mitthei-  
len / solche kunst vnd weißheit von ihm  
fund begeren / ein jeglicher nach seiner  
sinnligkeit vnd verstendnuß. Darumb  
Gott der Allmechtig Vatter sein Gött-  
lich



lich angesicht all zeit auff vns arme vns  
wirdige sündige Creaturen / auch allen  
enden barmherziglich zuneiget / vnd an-  
sichet / Dann er allein die gedanken der  
herzen erkennet / vnd alle ding weiß. Da-  
rumb / O Allmechtiger Gott / danck ich  
dir in deiner heiligen Trinitet / dann du  
barmherzigkeit vnd warheit den Men-  
schen beweiseest / wann durch deine Crea-  
turen deiner großmechtigkeit sehe ich dei-  
ne gewalt / In der schonheit bekenne ich  
deine weißheit / vnd in der fruchtbarkeit  
bekenne ich deine Gottheit / also verbrin-  
gestu deine werck.

Darumb ihr Leser vnd Artisten / dises  
Büchlin lasset euch nicht verdriessen zu  
lesen / solches mein langes verschreiben /  
Sondern nemmet wol acht / daß ich hab  
kein wort vergebens geschriben / es ist euch  
allen von nöthen darauß zu lernen / vnd  
wöllet ein jeglich wort bedencken / dann  
da seind vil verborghenheiten innen.

Nun fürzlich zu vnderweisen die war-  
heit diser kunst / welche Gott der Allmech-  
tig



tig den alten Weisen vollkommenlichen  
hat gegeben / welcher da sitzet in der höhe  
der himmel / vnd alle ding erschaffet vnd  
regieret / welcher ist ein fließender brunn  
vnd Fontein der ewigen Weißheit / vnd  
das Wort Gottes des aller höchsten / der  
da ist ein ewig wesen aller dingen. Dar-  
rumb in dem anbegin muß der jenig / wel-  
cher die kunst vnd weißheit lehren will /  
vonn Gott verstendnuß bitten / welche  
verstendnuß in disem Büch verschlossen  
ist / in dem aller warhafftigsten wort / wel-  
ches Wort Gott selber ist / welches von  
dem wort dem aller waresten Schatz der  
Schätz mit grossem fleiß auß der tieffes-  
ten vberdenckung gebracht mag werden /  
in dem garten der aller gerechtesten zusä-  
menlegung / der wahren pflanzung / der  
vollkommenheit aller Warheiten / alles  
was Gott vnd seine schöpfung alle / vnd  
Creaturen / mit sampt den Naturen. Vñ  
solliches ist vnd wirt getheilt in sechs sun-  
derliche Capitel / vñnd auch das die jeni-  
gen nicht treg seyen zu studieren inn  
der



der aller natürlichsten vnd höchsten fort-  
geng der dingen / welche von der aller  
höchsten vollkommenheit tractieren / vnd  
zülernen ist. Vnd welcher in diser kunst  
der Inwendigen verborgenen heimlich-  
keiten der Meister begeret zu sein / der se-  
he all sein vertrauen vnd meinung in  
den nammen des Herren. Denn er den  
lohn des studierens also gewiß vnd sicher  
empfangen wirdt / das wissen der heim-  
lichkeiten / mit der hilff der gnaden Got-  
tes / vnd nachsinnlichkeit seines verstand-  
nus / welche er füge vnd zwingt durch  
kein versäumung / sondern das er die en-  
dung des Fundaments von dem gebäu  
ausgrabe / welches Fundament des ge-  
bewes des Baumgartens aller weißheit  
vnd wissenheit / die Meister des studie-  
rens erkläret / welches schöner vnd köstli-  
cher ist / denn alles Silber / Gold / Per-  
len vnd Edelgestein / das auff dem Erds-  
reich ist.

Aber wer in diesem Buch studierens  
treg ist / der mag nicht kommen zu solcher  
fleis



kleidung vnd zierung der ehren / vnnnd zu  
dem kostlichen heimlichen schatz der vers  
borgenen wissenheit. Dann wiewol vil  
seind die sich lassen duncken / vnd schwö  
ren darauff / sie wohnen selber mitten in  
dem baumgarten. Ich sage das so war  
lich als Gott ist / das sie all ihr lebtage inn  
dem Baumgarten der heimlichkeiten nit  
gewesen seind / vnd haben auch ihr lebtage  
solches kein wissens gehabt. Darumb  
ist mit ihnen gleich als mit dem Esel / der  
da blind zu dem Abentmal geführt / vnnnd  
weiß nicht wohin er seinen mund recket  
oder stosset. Vnd also sagen sie dick / vnd  
disputieren von vil dingen / da sie keinen  
verstand oder wissenheit von haben. So  
gehöret es ihnen noch dennoch zuwissen /  
wollen sie ihrem nammen anders gnüg  
thun / darumb vnd dafür sie geehret vnd  
geheissen sein wollen. Wiewol hochge  
lehrte vil mal von manichen dingen ar  
guieren / gleich als wie der blind von der  
farb saget. Darumb so studiert vnd lers  
net in diesem Büchlin / das alhie züler  
nen



nen ist von dem Garten der heimligkeit/  
welche heimligkeit ist vber alle heimlig-  
keit/der wissenheit/die da ist verborzen in  
allen dingen der Naturen vnnnd Creatu-  
ren. Darumb so nemet vnd empfahet die  
gaben Gottes / in dem namen des Herrn  
Ihesu Christi.

Gott hat kein beginn noch anfang ge-  
habt/vnd sol auch kein end haben. Das ist  
nun naturlich zu bekennen / vnd zu glau-  
ben / das Gott kein beginn noch anfang  
gehabt. Dann hette Gott ein begin ge-  
habt/so müste dasselbe begin ein substanz  
oder wesen sein gewesen / welches wesen  
auch immer müste ein anfang gehabt ha-  
ben / vnnnd derselbig anfang müste denn  
auch ein beginn haben gehabt/ vnd so fort  
an / biß so lang das immer am letzten ein  
ding oder wesen gefunden müst sein wor-  
den/von welchem man kein begin het fin-  
den mögen. Dann also lang als man be-  
gin eines dings mag finden / so ist dassel-  
big nicht on begin. Vnd darumb so muß  
von



von not wegen ein wesen sein / von welchem man kein begin mag finden. So muß jñter mehr dasselbig letzte das man funden hat / sunder begin vñnd anfang sein. Ein wesen / ein substanz / sunder begin vñ anfang / vñnd dieselbige Substanz muß darnach in der erste sein gewesen / von welchem alle die andern ding herkommen weren. Darumb ist natürlich zu glauben / das Gott kein begin hat gehabt / wann kein begin noch anfang / sondern Gott gefunden wirt. Vñnd also ist natürlich zu bekennen / das er auch kein ende mag nehmen. Dann von was wesen oder substanz ein ding ein begin hat / durch dasselb wesen mag es wider zerstört werden. Vñnd darumb so Gott von keinem wesen noch substanz / begin / oder anfang gehabt / mag er auch durch kein wesen / noch von keiner substanz ein ende nehmen. Vñnd also ist Gott ewig gewesen / sunder anfang / dann in Gott wurde kein anfang oder begin gefunden / darumb soll er auch ewig bleiben / Vñnd also

E



ist Gott ewig gewesen / sunder anfang /  
soll auch ewig sein / ohne end / vnnnd sein  
macht ist vberal / an allen enden / vnnnd in  
allen dingen. Vnd Gott der da ist ein  
ewig wesen / in welchem da waren die for-  
men aller seiner gestaltnuß / seiner weiß-  
heit / des Sohns / vnnnd in dem willen sei-  
nes Göttlichen Heiligen Geists / wel-  
che gestaltnuß vnd Form war ein schein  
des Feürs in seiner Gottheit / drum kan  
Gott wol verborgen sein wo er will / vnd  
wahin er will / vñ w; er wil / dz kan er einē  
auch wol offenbaren / drum ist sein verbor-  
genheit vnd offenbarligkeit kein gemein  
Feür / wann es laßt sich nicht zu lang ver-  
bergen / sunder sich zu offenbaren / biß zu  
seinem göttlichen willen / welches verbor-  
genlichs feür war ein augenschein / vnnnd  
ein widerscheinender schein / welch wesen  
des scheins der menschlichen bekandniß  
in ihrem verstand ihrer sinnlichkeit nicht  
wol begreifflich ist / in welcher form ge-  
staltnuß vnnnd schein / das Gott gewesen  
ist in seinem Göttlichen wesen. Aber der  
Engeln



Engeln vnd der geistlichen wissenheit ist  
ein pliz/wesen/ vnd schein gewesen/ als die  
Geister das vollkommenlich zu erkennen  
gegeben haben/ vnd ist natürlich zu glau-  
ben. Denn ein rechte blawe farb helt vil  
liechts/ mit vil verborgener vnbestendli-  
cher farben in ihr. Wann ein schöne bla-  
we farb ist so frölich vnd lieblich anzuse-  
hen/ vnnnd der glanz des scheins in dem  
außscheinen/ vnd wider einscheinen der  
verborbenen farben thut den fleischlichen  
augen wehe/ vnd bricht dem menschliche  
gesicht seinen schein/ vmb des glanz wil-  
len des verborbenen feurigen liechts/ das  
nicht zu erkennen ist/ in der finstern ver-  
borbenen substantien.

Darumb spricht der Geist/ die fleische-  
lichen augen können das nicht gesehen/  
wann in blauer farben ist disterung vnd  
licht zu erkennen keinen geschaffenen  
Creaturen/ sunder allein noch zu wissen  
vñ bekant/ also ist es auch noch disterug  
vnnnd licht mit einander vermischet ge-  
wesen/ ehe Gott der Allmechtig Himmel

E ij



vnd erden erschüff / vnd darumb ist Gott  
 ein Corpus vnd ein Geist / wann er sich  
 tig gewesen / gleich einem Feür in einem  
 finsternen flammen / wann ein feür wirt ge-  
 halten für ein Corpus vnd für ein Spi-  
 ritus / wann das man sihet / das ist Cor-  
 porisch / vnd das man nit kan greiffen / das  
 ist Spiritualisch / darumb gesagt / Gott  
 ist ein Feür / vnd ein Geist / vnd der Geist  
 Gottes ist gewesen inn seinem eigenem  
 wesen / welches wesen ist gewesen das  
 Liecht vnd klarheit alles liechts / welches  
 da ist gewesen ein Spiritual Corpus / ein  
 Lüfftig wesen / als Baruch spricht / Das  
 ist vnser Gott / vnd kein ander soll gegen  
 disem geacht werden / noch geheissen sein  
 Darumb spricht Paulus / Auß ihm / in  
 ihm / vnd durch ihn sein alle ding / dem-  
 selbigen sey lob vnd ehre.

Vnd ehe das nun Gott der Almech-  
 tig alle ding schüff / wuste er wol / wie vil  
 Engel / vñ wie vil Menschen sein solten  
 vnd wievil der Engel fallen solten / vnd  
 wie vil Menschen behalten werden sol-  
 ten



ten / wie viel verloren sollen sein / Wusste  
 auch was ein jeglich mensch thun solt / vñ  
 die gedanken der herzen zu sprechen vnd  
 zu mercken / vnd was todes ein jeglicher  
 sterben solte. Vnd Gott wuste auch wol/  
 wie maniche zal von seinen geschaffenen  
 Creaturen/dann alle ding hat Gott ewig  
 gewüßt vnd gesehen in seiner Gottheit/  
 vnd das er aller ding mechtig war / durch  
 die ewigkeit seiner Gottheit zu geben vnd  
 zu schaffen/das dann natürlich ist zu glau  
 ben/Waß ein jeglicher künstlicher werck  
 mann / welcher ein werck zumachen be  
 ginnen will / so muß er das selbig werck  
 das er machen will / erst in seinem sinn  
 Imaginieren/wie solchs Werck sein soll/  
 in der gestalt nus/ form/ weit/ groß/höhe/  
 vnd dieffe / vnd von was Substanz er dz  
 machen soll/ von holz vnd stein/ oder von  
 anderen materien / darauff er auch wol  
 kan mercken / wie lang es weren mag/  
 darnach es an einem ort stehen soll / trus  
 tten oder feucht/ darnach/oder auch nach  
 demselbigen nimpt er auch die substanz.



Nach dem allem / so kan er bey nahe wol  
vberschlagen / was das Werck wol kosten  
solt : Also ist natürlich zu glauben / das  
Gott der Allmechtig die ewige weißheit  
ein Meister aller ding / welcher da ist die  
weißheit aller weißheit / vnd der Meister /  
aller Meister / von welchem die welt ihr  
weißheit vnd meisterschafft hat / vnd ein  
jegliches so vil als seinem Göttlichen wil  
len gefellig ist / 2c. Solte dann dieselbige  
ewige weißheit vnd Meister nicht züvor  
gewist haben / vnd solches gesehen in der  
ewigen Gottheit vnd weißheit / alle ding  
die allhie geschaffen wurden / wie sie sein  
sollen / der anfang / mittel / vnd ende? Das  
war in der Naturen nicht möglich / das  
er solches alles züvor in seinem Göttli  
chen wesen vnd weißheit nicht gesehen /  
oder solt gewist haben. Dann so Gott  
aller dingen ein anfang vnd vrsach ist /  
darumb ist natürlich zu glauben / das er  
alle ding züvor gewust vnd gesehen hat /  
wie sie werden vnd sein sollen / durch sei  
ne ewige allmechtige Gottheit / vber alle  
ding



ding wesend / als denn vngeweiffelt ist/  
ein warhafftiger Gott / von dem vnd von  
welchem alles wesen seinen anfang / vrs  
prung vnd leben nimpt / durch den / wel-  
cher alle ding geschaffen hat durch sein  
ewig Wort / als dann vil Lehrer schrei-  
ben / vnd vns lehren / wie das die Göttli-  
che weißheit ist beschriben in der Biblien/  
welche da ist ein wort des ewigen worts/  
durch welches wort dz ewig wort erleuch-  
tet alle wissende ding / die von Gott ge-  
schaffen sein / Als die Engel / die Himmel/  
die Stern / die vier Element / auch ande-  
re Creaturen empfanglichen / vnd alle  
Menschen / so in dise welt kummen / wel-  
ches alles geschehen ist / vnd künften durch  
das ewig wort / welches wort / als Hiero-  
nymus spricht / das der wolgelehrt Plato  
nicht gewüßt hat / denn das wort ist gar  
vnbekant gewesen den wolsprechenden/  
Als dann auch schreibet Demosthenes/  
vnd auch Paulus zu den Römern / also  
haben sie Gott bekant / so haben sie ihn  
doch nicht geehret gleich Gott / dann sie

E iiii



seind verschwunden in ihren gedanken.  
Darumb sagt Salomon : Das Büch  
des Lebens ist ein Testament des Aller-  
höchsten/ vnd ein wissenheit der warheit/  
beschleußt vnnnd begriefft alle dise ding.  
Welches Büch ist die Bibel / vnd ist das  
Büch der heilige Schrift/ das Büch des  
Lebens / welches vnsterblich ist / vnd kein  
ende nimpt / als Ezechiel sprichet / in der  
person Gottes / Ich hab ihm gegeben  
meine gerechtigkeit / die der mensch thun  
soll / auff das sie in ihr bleiben/ vnnnd die  
ihn lernen / die sollen haben das ewige  
leben.

Hierumb / so ruhn in keinem Büch  
oder wissenheit des Menschen heil vnd  
seligkeit gelegen ist/ dann in der weißheit  
seines Gottes / welche Weißheit allein  
stehet in dem Büch der heilige Schrift/  
welches da ist die Bibel / das bekendlich  
macht den Schöpffer vnnnd Heilmacher  
aller Creaturen/ dasselbig Büch ersuchet  
recht/ so solt jr finden vnd verstehen/ was  
Johannes in seinem Euangelio geschrie-  
ben



ben hat / in welchem Euangelio Johan-  
nes offenbarlichen Gott vnd alle geschaf-  
fene Creaturen / vnd alle ding verkläret  
hat / die gerechtigkeit / die Gott dem men-  
schen gegeben hat / das er darinn leben vñ  
thun soll / als hie geschriben steht. Folget  
das Euangelium Johannis.

Im anfang war das Wort / vñ  
das wort war bey Gott / vnnd Gott war  
das wort / dasselbig war im anfang bey  
Gott / alle ding seind durch dasselbig ge-  
macht / vnnd ohn dasselbig ist nichts ge-  
macht / was gemacht ist. In ihm war das  
leben / vnnd das leben war das liecht der  
menschen / vnnd das liecht scheinet in der  
fisternuß / vnd die finsterniß habens nie  
begriffen. Es ward ein mensch von Gote  
gsandt / der hieß Johannes / der selbig  
kam zum zeugnuß / auff das er von dem  
licht zeuget / auff das sie alle durch ihn  
gauben solten / Er aber war nicht das  
licht / sondern das er solt zeugen von dem  
licht / das war das warhafftig Licht /

E v



welches alle menschen erleuchten thete/  
 so in dise welt kummen / Es war in der  
 welt / vnd die welt ist durch das selbig ge-  
 macht / vnd die welt kante es nicht. Er  
 kam in sein eigenthumb / vnd die seinen  
 namen ihn nicht auff / wievil ihn aber  
 auff namen / den gab er macht Gottis  
 kinder züwerden / welche an seinen nam-  
 men glauben / welche nicht von dem ge-  
 blüt / noch von dem willen eines manns  
 geboren seind / sonder von Gott geboren.  
 Vnd das Wort ward Fleisch / vnd woh-  
 net vnder vns / vnd wir sahen sein her-  
 ligkeit / eine herzigkeit als des eingebo-  
 ren Sohns vom Vatter / voller gnaie  
 vnd warheit / Amen.

### Die erste Wirkung Gottes.

**I**n diesem ersten wort ist begriffen/  
 die ganze natur / in dem himel vnd  
 der erden / welche natur er im anfang auß-  
 getheilet hat / durch das ewig Wort / we-  
 ches wort Gott selber ist / vnd im anfang  
 war



war das leben/ vnd das liecht/ das da war  
leuchten in die finsternuß / vnd dasselbig  
wort des ewigen Liechts / ist von den  
hümlischen wissenheiten genennt / vnd  
durch welches wort ein sonderlicher ver-  
stendiger lehren / wissen / vnd gründlich  
bekennen mag / alles das im Himmel vnd  
Erden ist / die alle kummen sein von dem  
ewigen wort Gottes / in welchem wort  
des finstern gestübs / mit den feuchten  
wolcken verborzen war das warhafftig  
liecht / in der finsterheit / welches liecht/  
das leben vnd Seele aller seiner geschaff-  
nen dingen / durch welches liecht das le-  
ben / die Seele / vnd alle ding erleuchtet  
worden / vñ leben von dem ewigen liecht/  
welches liecht Gott selber ist / vnd ist die  
sexta essentia, vnd das medium aller din-  
gen ; Dann Gott ist die sexta essentia,  
Dañ in dem ersten wort d; Gott sprach/  
darinn schüff er das Liecht des Lebens.  
Als da er sprach : Es werde liecht. Das  
selb das da liecht ward / ist das liecht des  
lebens/ das alle ding helt. Dann in wel-  
chem



chem ding das liecht des lebens nicht ist/  
das vergehet / vnd wirt zu nicht / vnd da-  
rumb ist das Liecht des Lebens in allen  
dingen/ die Gott der Allmechtig geschaf-  
fen vnd gemacht hat/ vnd so bald ein sub-  
stanz zergethet vnd zu nicht wirt / so gehet  
dasselb leben widerumb zu dem leben vnd  
licht/ das es zuuor darvon getheilet hat/  
durch mittel der wirklichkeit / vnnnd ver-  
mengung der 3. Elementen / in welchen  
dreyen das viert Element des Feürs ver-  
borgen ist/ in welchem feür das Liecht des  
lebens ist / welches leben ist das wesen vñ  
die weißheit aller geschaffenen dingen in  
dem Himmel vnd der Erden / dann ohne  
das wesen kan nichts sein / darumb durch  
das wesen des ewigen wesens ist alle ding  
im wesen.

Nun furßlich zu offenbaren vnd zu er-  
kennen zu geben/ was das ding sey/ das in  
allen dingen ist / vnd sunder vnd ohn das  
ding kan nichts geschehen noch werden.  
Dasselbig ding ist die Göttliche krafft/  
vnd Gott hats von ihm geschaffen/ durch  
sein



sein ewiges wort/wie ihr dann eins theils hievor gehört habt/Denn von was Complerion die natur eines dinges ist / derer naturen ist es geboren. Nun hat Gott der Allmechtig alle ding geschaffen vnd gegeben / vñ Gott ist ein verborgen feür / darumb hat er auch geschaffen ein verborgen feür in der ersten materia.

Vnd Gott der Herr schüff die Engel von den geistlichen Elementen des feürs der erstē materij / welches vber den begriff des menschen verstand ist / auß welchem da ist vndercheid des suppositi, das ist ein bescheidung / das kein ding dem andern gleich ist / vnd darumb seind die Engel feür / dann sie sein von solchem wesen der geistlichen Elementischen Feüren. Darumb seind sie also vil klarer / vnd scheinen geistlichnam / welches den menschen schwerlich ist zu erkennen / Dann vmb ihrer grossen subtilheit willen können vnd vermögen sie durch alle ding / on verletzung derselben / wie ein blick / gehen / geleich wie auch die Seele des mensche /  
welche



welche Gott auch von der selben substantz  
geschaffen hat/ vnd darumb ist eins men-  
schen Seel auch ein Feür / von dem zu-  
vor die Engel gemacht sein / vnd Gott  
hat des menschen Seel noch höher bega-  
bet mit der sechsten Essentia, das ihm selb-  
ber ist unbekant / vnd das leben ist in al-  
len dingen / ist vnendlich als Gott/ vnn-  
dasselbig he:ßt Anima, aber sie ist in ei-  
nem ding klarer als in dem andern/ dar-  
nach Gott der Almechtig in seinem göt-  
lichen willen seines heiligen Geists / ein-  
jeglich ding geschaffen hat zu seiner bes-  
sonderheit / in demselbigen ist die Anima  
auffs aller kleinst vnn- reynest / welche  
wirkung der Anima, die Engel/ die men-  
schen/ noch die Hellschen/ durch ihre sub-  
tiligkeit innwendig nicht mögen sehen/  
oder begreifen. Dann Gott hat ihm sol-  
ches allein gehalten / darumb er auch als  
ein Gott/ ein Herz / vñ gewaltig ist vber  
alle Creaturen. Derhalben niemand ge-  
dencken soll / das Gott etwas geschaffen  
hab/ das sich ihm vergleich/ oder gleich  
machen



machen möge. Dann het Gott solchs den Engeln offenbaret / so weren sie gleich geacht gewest in der wissenheit / vnd weren seine freünd / vnd nicht seine Diener gewesen. Also thut auch Ihesus Christus sein eingeborner Son / welcher auch nicht wolt offenbaren / noch sagen / da ihm die Juden im Tempel fragten / durch was macht er solche wunder thete / oder von wem ihm die macht gegeben sey. Er aber gab ihnen kein antwort darauff / dann sie waren nicht würdig / solches zu wissen. Aber Gott sprach zu seinen Jüngern / nach dem Abendmal / der Fußwäs- schung / da er so lang vnd vil mit ihnen redet / Ich nenne vnd heiß euch meine Freund / dann alles das ich gehöret hab von meinem Vatter / das hab ich euch ge- offenbaret vnd gesagt / vnd darumb wil niemand sein heimlichkeit vñ wissenschafte einem andern offenbaret / so ist derselbig darnach ihm gleich geachtet / Darumb weil der ander auch weiß was er weiß / darumb so hat ihm Gott allein behalten  
in seis



in seiner Göttlichen maiestet / denn da  
ist die Anima in ihrer Wirkung / dann es  
ist ein subtilig feurig wesen / das die En-  
gel noch niemand sehen / noch verstehen  
kan.

Aber ein gleichnuß / wie ist zûsagen  
nach menschlichem verstand vnd beriff/  
so wer das ein wissenliche wie ein schein/  
oder wie ein wörmigkeit von der flammen  
eines Feurs / welches da ist der geist / vnd  
die wirkliche krafft des Feurs widerste-  
hend / kein ding ist ihm auch nicht wider-  
spennig / vnd die vn sichtliche / vnendli-  
che wörmigkeit ist das wesen aller wesen/  
der dingen die vnder dem Himmel seind/  
vnd alle ding werden durch den geist der  
lufftigen wörmigkeit des feurs enthaltē/  
wann die wörmigkeit ist der geist / vnd d-  
leben / dadurch alle ding spermatisieren/  
leben / wachsen / vnd sich mehzen / vnd in  
dem wesen sein vnd bleiben / alle empfind-  
liche vnd vnempfindliche / vernünfftige  
vnd vnuernünfftige Creaturen. Vnd al-  
so ist die Anima zûuergleichen / welche  
noch



noch vil subtiler/ vnſichtlicher/ vnmerck-  
licher/ vnwiſſentlicher/ vnd dem menſch-  
lichen verſtand nicht wol zu begreifen/  
wie ſie / oder was ſie ſey / dann ein Feür/  
des feürs / welches da iſt von den lüſſti-  
gen Elementen der feüren. Vnd darumb  
das es ſo vnbegreiflich / vnſichtiglich/  
vnd vnwiſſentlich iſt/ darumb ſeind auch  
alle ſeine werck vnbegreiflich / vnd vn-  
ſichtlich. Dann niemand kan ſehen/ wie  
die Natur wirckt Graß / Laub / Frücht/  
Thier/ Menſchen. Alle ding thun wach-  
ſen/ vnd wachſen durch die mittel Natur/  
von welchem ich hievor ſo vil geſchriben  
hab. Vnd wenn ein menſch da ſtünde/  
vnd ſehe ein graß / holz / laub ſtetigs an/  
ſo könnte er dennoch nicht ſehen / das es  
wüchſe / vnd dennoch wechſt es ohne vn-  
derlaß / ohne auffhalten / vnd man ſihet  
wol / das es gewachſen iſt / aber man kan  
nicht ſehen das es wechſt. Darumb wie  
es iſt in ſeinem weſen / alſo thut es auch  
ſeine Wirkung inn allen dingen / nach  
der Complexion/oder Composition/ oder

S



vermengung der Elementen / ein jeglich ding nach seiner art vnd gestaltnuß / wie es Gott geschaffen vñ geordnet hat / nach seiner Göttlichen weißheit.

Vnd die mittel Natur zutheilet alle ding mit ihrer hitz vnd feuchtigkeit / vnd füget auch alle ding zusamen durch ihre hitz vnd feuchtigkeit. Dann die mittel Natur ist ein Saat vnd sperma in allen wachsenden dingen / vñnd ist das Feür / vñnd das sechste wesen in allen dingen / vnd die Anima hat die eigenschafft / das sie die gestaltnuß der Composition der Elementen eines jeglichen dinges nicht leß verkeren / dann ein gleiche gestalt in die andern.

Also gleicherweiß / in den Baumen pflanzet man holz auff einen baum vnd pfoß / od ppropffte darnach vff den stumpff oder stamm des Baums / Apffel / Birn / Kirschen / Trauben / vnd ein jeglichs blüet vñnd wechß nach seiner art vñnd gestalt nuß seiner form / vnd vermengt sich nicht in ein Substanz / oder zu einerley frucht  
einer



einer frembden gestalt / ob sie gleich auß  
einerley holz vnd wurzel wachsen / dar-  
durch sie wachsen / vnnnd diß so in ein  
ander verbunden / ist in allen nur ein  
ding / ein band / welches da ist die mittel  
Natur / durch welche alle ding seind / vnd  
were das wesen der mittel Natur nicht /  
so were es gleich wie es war / ehe Gott  
alle dise ding schaffet. Vnd das wesen /  
oder die wissenheit / das ist die Anima,  
darumb / das durch die Anima seind alle  
ding in wesen kummen / thun auch also in  
einem wesen bleiben / vnd darumb wurde  
auch die Anima die wissenheit / vnd das  
wesen geneuet / das die mittel natur auch  
darinn ist / darumb ist dasselbig ding ein  
substanz oder materia / darumb hat auch  
dasselbig ding ein form oder gestalt /  
So ist auch die mittel natur die Saat /  
vnd sperma in allen dingen / vnd die mit-  
tel natur macht / das sich die Elementen  
gleich vermengen / wie sie die begreiffe  
durch ihre feurige feuchtigkeit / vnd sie ist  
das leben des Spiritus, in allen empfeng-

F ij



lichen vnnnd vnemphenglichen dingen.  
Item die erde ist schwarz in sich/darnach  
ist ein grienigkeit darinn/das ist das höch  
ste wesen / oder die mittel natur / die alle  
ding inn der erden in allen Elementen  
grünen machet.

Vnd das ist nit weniger vnterscheid  
zwischen der Anima der menschen / vnnnd  
zwischen der Anima in allen andern din  
gen in der welt / Deñ das die Anima die  
vnder himmel ist vmbhangen vnd bekley  
det ist mit den lufftischen materialischen  
Elementen/ eines theils offenbart ist den  
Engeln / nach dem willen vnd ordinie  
rung Gottes des Almechtigen / vnnnd die  
Anima die in dem himel ist / vnd die seel  
des menschen ist bekleidet vnd vmbhan  
gen mit der quinta essentia der geistli  
chen/himelischen/reinen/flaren Elemen  
ten / vber den begriff des menschlichen  
verstands / auß welchem ist der vnder  
scheid des suppositi.

Vnd Gott ist die Anima vnd das le  
ben der Naturen / vnd ein lebender Spi  
ritus



ritus, vnnnd Anima, vnd darumb von der Anima heist Gott ein schöpffer aller dingen / denn von der wegen hat Gott geschaffen himmel vnd erden / vnd alles das darinnen ist.

Item / alhie ist ein frag/ob die Anima auch einen leib habe. Antwort einer darauff : Die farb der Sonnen ist ein leib der mitteln naturen/ vnd die farb der Sonnen ist dem menschlichen gesicht weiß/vnnnd der geist ist blaw/ vnd die farb ist in allen dingen der Elementen verbor gen.

Also sey nun genugsam gesagt von der Anima, einem jeglichen verstendigen darauff zülernen/ wie er alle ding herauß vnd dardurch begreifen möge / vnd den vnderscheid / wie ein ding für dem ande ren ist / jeglichs nach seiner art vnnnd gestaltenuß zu erkennen/ auch gründtlich alle schrifftten zu erfaren.



Nun zumercken / vnd zum theil  
zúwissen / so vil dem menschlichen ver-  
stand möglich zú thün / ein jeglichs nach  
seiner sinnligkeit / vnd der ordinierung/  
vnd vnderschiedenheit der schöpffung / in  
welchem verstand ein vnderscheid in di-  
sen folgenden Figuren begriffen ist / vnd  
ist das Fundament / die einem zúuerste-  
hen / wie dann hievor dauon geschriben  
ist.

Aller dingen begin  
vnd anfang / vnnnd  
ursach / ein Gott als  
mchtig / vnwan-  
delbar / vber alle  
ding wissend / aller  
ding schaffend auß  
nichts / hat ein  
wesen volbracht /  
ewig / perfect / rein /  
abgescheiden vor-  
stand.



Ein wesen oder materia prima aller dinger erste Schöpfung / inn welcher seind die formen aller Creaturen.

## V. essentia.

Essentia der geistlichen Elementen vber den begriff des Menschlichen verstandes / auß welchem ist vndercheid des suppositi / das ein abschneidung / dz kein ding dem andern gleich ist.

Das ist das geistliche feur / allein Got bekant / das figurieret die natur der geisten.

Das ist die geistliche Luft / in ihrer officien zu der vndercheiden.

Das ist die spiritual terra / vns vnstetig / vnd vngründlich.

## V. essentia.

Essentia der materialischen Elementen eines theils offenbaret den Engeln / auß welchem das suppositum vndercheiden wirdt / die alle ding natur.

Das ist aqua spiritual / in ihrer ordnung vorgesagt inn ihrem vndersten.



Die Engelische  
spiritus.

Die Menschliche  
spiritus.

Die böse spiritus.

Das Materialische  
Feur / rein Element /  
vnfichtig / verborz  
gen für vnserem für  
len / Sinnen / nicht  
warm noch kalt.

Die materliche lufft  
verborzen für vns /  
rein Element.

Aqua.  
Kein Element.

Terra.

Die Menschen.

Die vnuernünfft  
tigen Thier.

Bäum / Stein /  
Metallen.

Die



Die fontein des vrsprungs der ewigen  
weißheit in dem höchsten / durch seine  
milte Gottheit / hat den obersten Thron  
des himmels / die Engel in der ersten Ma-  
teria durch sein ewig Wort geschaffen /  
Als da er sprach : Es werde Liecht / vnd  
da es liecht ward / theilete das liecht von  
der Finsterniß / vnnnd nennet das Liecht  
Tag / vnd die finsterniß Nacht / vnnnd als  
solches getheilet vñ geschehen war durch  
sein ewig Wort / das auß der prima mas-  
teria / die da wie gestäub der Sonnen ge-  
stalt war / vnnnd die Gott der Almechtig  
auß nichts geschaffen hatte / die Engel /  
alle dise 3. dingen zur stund in dem ersten  
ward / vñ die prima materia ward in dem  
selben gleich zu wasser / welches da ein  
theil entledigt war / vnnnd die Finsterniß  
warẽ auff dem angesicht des Abgrundes  
der vnderscheidenlichen Elementen / vnd  
also war das Wasser das erste Element /  
welches die andern Element verborgens  
in sich hatte / vnd da flohe der Geist Got-  
tes ober die wasser in dem feürigen him-

3 v



mel / welcher Empyreus genennet wird.  
Dannes ist ein heimliche statt des gro-  
ßen gewalts / in welchem Thron die Got-  
theit sitzt. Denn Thronus heißt ein him-  
mel der obersten Heiligen Trifaltigkeit /  
oder des allerhöchsten stüls Gottes. / wel-  
cher himmel mit den Engeln vnd mit dem  
obersten liecht der klarheit / die Gott selb-  
ber ist / gezieret ist.

Zur stund war die vber Erklörung des  
obersten Throns des himels / welches da  
war die behaltens der Obersten seiner  
ewigen wirkungen / seiner schöpfungen /  
welches Liecht Gott den Tag nennet /  
darumb / das seine geschaffene Englische  
Creaturen erkennen möchten seine ewi-  
ge Allmechtigkeit / durch welche ewigkeit  
der tag des Liechts / das Gott selber ist /  
durch sein ewig wort seiner schöpfung /  
auch soll ewig bleiben.

Durch welche Ewigkeit die Engeli-  
schen Creaturen bekennen / das er sey der  
anfang vnd vrsach aller Creaturem vnd  
dingen / ein Gott / Allmechtig / vnwandel-  
bar /



bar vber alle ding wesende / alle ding auß  
nichts schaffend / hat ein wesen volbracht /  
ewig perfect / durch welches perfect ewig  
leben vñ wesen alle die Engelische Crea-  
turen erkennen die ander geburt seiner  
schöpffung auß der Finsterniß / welche  
Gott die nacht neñet / noch demnach ver-  
borgentlich geschaffen were / ein Liecht /  
welches liecht leuchtend ward vber sie / vñ  
ward vber sie gesetzt / vnd dasselbig liecht  
ward die menschliche natur.

Vñ Gott schüff die Lufft des gestäubs  
der ersten Materij / güt vnd böß / all gleich  
vil ihn erscheinete / nicht in allen enden  
sein wort ewig geschaffen / von dem vollen  
kommenen vngeschaffenen Gott.

Vnd Gott erkennete darinnen alle  
ding / güt vñ böß / alles das er darauff  
schaffen wolte / vnd auß der klaren lufft /  
schüff Gott Lucifer / mit seinen gesellen /  
ein scheinet lufft klerer durch die andere  
lufft / vnd das liecht schein / welches war  
Lucifer / also ward die finsternuß / aller  
der bösen lufft geschaffen / vnd Clar ohne  
sünd /



sünd/ also ward im anfang / das böse vn-  
der dem guten beschaffen/ bezwunge/ dan  
die böse lufft kan sich wol durch die gute  
lufft beschern/ aber das geschahe nicht im  
Lucifer/ vnnd seiner gesellschaft/ Dann  
da Lucifer der Engel sahe / daß das ver-  
borgene liecht / in der ersten materien der  
wassern solt leuchten vnd werden / vber  
die Engelische Creaturen/ da gewan Lus-  
cifer den neid/ den er hat gegē der menschs-  
lichen naturen / vnd da begünte/ im zu of-  
fenbaren / die finster lufft im Lucifer/ die  
in der klaren lufft verborgen war / vnd die  
düster vnreine lufft überwunden die klar-  
ere reine lufft.

Vnd also im anfang ergert sich Lucis-  
fer der Engel / da er das mal auß der heis-  
ligen Trifaltigkeit/ den klaren spiegel ses-  
he möchte/ da verwundert er sich/ an dem/  
wie das greng vmb malen / gleich einem  
Circkel / vnd dise Heilige Trifaltigkeit/  
ein soñe/ des klaren spiegels/ so da hat als  
le seine tugent der Gottheit in ihr / Da  
gedacht Lucifer / hat Gott alle dise ding/  
vnd



vnd grosse tugent in jm beschlossen / So  
hab Lucifer alle grosse vntugent wider da  
gegen / So weiß ich / vnd bin / das in mir  
beschlossen ist / trucke ich alle meine vntu  
gent auß / so fliegē alle tugent Gottes fort /  
So kumme ich vber des höchsten Gottes  
raht / gleich seiner statt / dann er ist Gott /  
vnd er fleucht meine bößheit.

Vnd da Lucifer auß gang seinem frey  
en willen / die letzten vntugent dacht / da  
fiel er mit allen seinen gesellen / durch als  
le himlische Thron / dann die himmel kun  
ten in nicht lenger behalten / sie kanten in  
wol / mit allen seinen gesellen / so etwas  
von jm hielten / Lucifer vnd seine gesels  
len wusten nicht Gottes sterck / allmech  
tigkeit / da gar nichts vor verborzen ist /  
vnd wüsten nicht das ein jeglichs / so da  
ward / gut vnd böß / seinem schöpffer die  
nen müste / Dann wider die allmechtige  
Gottheit gilt oder hilfft kein ander ster  
cke. Also geschahe die erste sünde in dem  
himmel / aber Gott schuff Lucifer ohne  
sünde / mit der klaren reinen lufft / vnd  
die



die sünde / war finster / vnreine lufft/  
Dann Lucifer mit seiner gesellschaft/  
war von den Elementen der Lufft / wel-  
che bedeckten / bezwungen / vnd besetzten  
die vnreine lufft / aber Lucifer / durch sei-  
nen freyen willen / zog auß die vnreine  
lufft der sünden / da er im Himmel war/  
dann im Lucifer war die vnreinigkeit der  
lufften / vnd der himmel war gereinigt/  
da Lucifer mit seiner gesellschaft herauß  
gestossen ward / vñ Lucifer war gefallen/  
ehedann Adam geschaffen ward.

Also war die erste wirkung Gottes/  
durch sein ewiges wort / auß dem gestaub  
der ersten materia / welche Gott in wasser  
verwandelt / von welcher ersten Materij  
des wassers / Gott der Allmechtig her-  
nach alle ding schuff / als die himmel des  
Firmaments / die Sonn / Mond / vnd alle  
stern an dem himmel des Firmaments/  
vnd alle Creaturen / empfindlich / vnd  
vnempfindlich / vernünftige vnd vnuer-  
nünftige / welche ding Gott der Allmech-  
tig darnach schuff / auß der ersten materi-  
en / der



en / der wassern / durch seine allmechtig-  
keit / durch welche allmechtigkeit die was-  
ser gehorsam waren sich zu theilen / nach  
seinem Göttlichen willen / durch sein es-  
wig Wort / da die erste materia der was-  
sern geschaffen war / 2c.

### Die ander Wirkung Gottes.

**I**n der anderen Wirkung / sprach  
Gott / Es werde ein firmament / ein  
festung zwischen den wassern / vnd Gott  
machet das Firmament / vnd scheidet das  
wasser vnder dem Firmament / von dem  
wasser vber dem Firmament / vnd Gott  
nennet das firmament Himmel / welcher  
himmel von dem aller Edelsten / Reines-  
ten / subtilsten / vnd klaresten der aller  
perfectisten substantien der Lüfften / von  
der ersten materien der wassern außge-  
zogen vnd geschaffen / durch das Wort  
des ewigen Worts / welche schöpfung  
des himmels ist ein quinta essentia, Dañ  
die quinta essentia ist ein klares durch-  
scheinen



scheinendes / vnuergengliches / vnuer-  
brenliches corpus bey ihm selber / oder  
bey sich selbs abgescheiden von allen ele-  
menten in der materien vnd forma / vnd  
die scheinende klarheit / daher / das diese  
quinta essentia geschaffen ist / auß den  
wassern / vñ ist die perfectheit der wasser /  
in welchem corpus die quinta essentia  
der Complexion / der naturen vnd krafft /  
der vieren Elementen ganz gleich ver-  
mendet sein / im gewicht von hixen / inn  
felte / feucht vñ truckē / durch solche gleich-  
förmige der vermengung vñnd verbins-  
dung / magnun noch nimmer mehr kein  
corruptio , noch kein spott darcin kum-  
men / oder durch andere ding corrupie-  
ret werden / vmb der vrsach willen / das  
ein jeglich quinta essentia von der corru-  
ption abgescheiden wirdt / welche cor-  
ruptio ist die oberflüssige unreinigkeit der  
Elementen / mit welcher oberflüssigkeit /  
unreinigkeit die quinta essentia vermen-  
get ist / darumb sie nicht gesehen / noch ge-  
merckt kan werden / in den wesenden E-  
lemen-



lementischen geschöpffen vnnd dingen.

Vñ wann ein quinta essentia gemacht wirdt von einer jeglichen elementischen Substantien/ oder materien/ so wirdt es auch ein himmel genennet/ als denn wol mäglichen/ vnd natürlichen/ eim erfarenen Artisten vnnd künstler der natürlichen philosophischen kunst/ welche philosophi auch zwo quinta essentia gemachet haben/ auß den wesenden Elementischen dingen / von welchen die Natur / die quinta essentia der aller nechst wardet/ Dann in einem ding/ es sey neher/ besser/ kürzer/ vnd nußer/ auß einem mehr denn auß dem anderen / deñ sie wol das erkant haben / vnd gewußt / durch die natur/ die Gott der Almechtig geschaffen hat / hie in disem thal der nacht / denn da sein zwo quinta essentia, in dem himel/ vnnd auch in der Erden / vnnd die zwo quinta essentia, das sein die Stern / vnd die ander quinta essentia ist der Himmel an sich selbs. Welche quinta essentia des himmels ist von den wasseren/ vnd die Stern

¶



sein quinta essentia von der corporischen  
substantien der himmeln/22.

Also ist auch hie auff erden / das man  
von den dingen der wassern auch quin-  
tam essentiam mag machen / auch von  
dingen der Irdischen naturen / kan man  
quintam essentiam gemacht haben / durch  
die gnade Gottes / vnnnd eingebung des  
heiligen Geistes / Dann ein Meister  
Clardus genant / fragte den geist / ob ein  
mensch den Stein / oder die quintam es-  
sentiam machen möcht / von welchem die  
alten Philosophi so vil geschriben haben /  
Antwortet der Geist / was Gott geschaf-  
fen hat / vñ beschüß zu haben / das ist dem  
menschen müglich. Darumb haben die  
Philosophi dise quintam essentiam artis-  
ficialem, auch einen himmel gehabt / daß  
sie hat ein krafft des himmels / denn wo  
ein solche gemachte quinta essentia von  
disen zweyen vndern elementischen Kör-  
pern ist / da kan / noch mag / noch will kein  
böser geist bleiben / noch kommen / So we-  
nig als Lucifer inn dem himmel hat mö-  
gen



gen bleiben/vñ vmb der krafft willen/wird  
 dise quinta essentia durch kunst gemacht/  
 von menschen henden / dem himmel ver-  
 gleichet/vnd also genennet/ darumb wañ  
 ein ding erst also von der vnreinigkei-  
 t geschiden wirdt / so kan es sich darnach mit  
 dem vnreinen nimmer mehr vermengen/  
 dann es seind darnach zwo contrariæ na-  
 turæ, also ist auch nicht möglich/ das der  
 himmel vergeh / oder das er sich wider  
 mit der materia/ auß welcher er vñ Gott  
 dem almechtigen geschaffen ist / verein-  
 ge / wiewol Gott alle ding möglich sein/  
 aber Gott thut nit wider die natur, denn  
 Gott hat die Natur in allen dingen mit  
 irer eigenschafft geschaffen vnd also hat  
 Gott das Firmament des himmels auß  
 der ersten materia geschaffen/22.

### Die dritte Wirkung Gottes.

**I**n der dritten Wirkung sprach Got/  
 Es samle sich das wasser vnder dem  
 himmel / an sundere orter / das man das

G ij



trucken sehe / vnd es geschahe also / vnnnd  
Gott nennet das trucken Erde / vnnnd die  
samlung der wasser nennet er Meer. In  
disen dreyen wirkungen Gottes / wur-  
den die vier Element perfect / jegliches in  
sein wesen vndercheidlich / in sich selbs  
wesentlich / vnder welchen sein drey sich-  
tiglich / als nemlich / die erden / wasser vnd  
feur / das viert ist vn-sichtiglich / das ist die  
Lufft / vnd solche alle vier seind volkum-  
menlich / allen empfanglichen vnd vnem-  
pfanglichen / vernunftigen vnd vnuer-  
nunftigen Creaturen / vnnnd vnder den  
drey sichtiglichen Elementen / seind nicht  
mehr dann zwey leichnamliche / oder cor-  
porische elemente / als die Erde / vnd das  
wasser / welches man sehen vnd greiffen  
kan / dann ein jedes ding das man sehen  
vnd greiffen kan / das ist ein corpus / vnnnd  
von jrdischer substantia / vnd die anderen  
Element sein spiritual element / als das  
feur vnd die lufft / welche man nit greif-  
fen kan / sunder man fület sie wol / vnnnd  
das feu ist nicht mehr / dann ein halb spi-  
ritus /



ritus/darumb/das man es sehen kan/vnd  
 derhalben/das man es nicht greiffen kan/  
 ist es ein spiritus / vnd ist das edelst / vnd  
 höchst Element/ denn ohne das Element  
 des Feürs könte man nit sein oder leben.  
 Die zwey spiritual Elemente sein der  
 Mañ / vnd die zwey leichnamliche Ele-  
 ment sein die Fraw / durch welche zwey  
 mannliche spiritual Element die andern  
 zwey leichnamliche frewliche Elementa/  
 in wercklicher volbringung/ nach dem ge-  
 bott Gottes des Almechtigen/ vnnd wil-  
 len / die da durch die natur die eigenschafft  
 der würckung gegeben hat / als da Gott  
 sprach/ die erden grüne/ vñ bringe frucht/  
 graß vnd fraut/das da samen mache/vnd  
 wachse holz das Epffel trage/ vnd der sa-  
 me sey in ihm selber / auff der erden/ Ein-  
 jeglichs nach seiner art vnd gestaltnuß.

Vnd also hat sich in der ersten mater-  
 ria des wassers / auß dem gebott vnd wil-  
 len der Ordinirung des Almechtigen  
 Gottes in drey gradus außgetheilet / als  
 in Luft/ in Erden/ vnd Wasser/ vnd das



vierte ist in disen dreyn verborzen / das ist das feur / vnd ein jegliches ist in ihm selbs dreynfeltig / als das wasser / das in ihm hat lufft vnd feur / denn hette das wasser nit lufft vnd feur in ihm / so könte es sich nit bewegen zu seiner wirckligkeit / dann die lufft vnd feur ist das leben / damit es bewegt wirdt durch alle ding zu gehen / vbersich vnd vnder sich / durch die erden / durch stein / durch holz / vnd die wermigkeit des feurs / ist das erwernet / vnd spermatisiert die feuchtigkeit vnd felt des wassers / damit es die wirckung seiner feuchtigkeit mag verbringen in empfenglichen vnd vneempfenglichen dingen.

Vnd ob jemandt wolt sagen / Es sey kein feur im wasser / der frage die Schiffleut / auff dem Meer farend / die das wol wissen / weñ ein groß vngestüm auff dem Meer ist / wie es des nachts brennet / vnd leuchtet / gleich einer schönen flammen / vnd darumb das man kein Feur darauff gewinnen kan / von materialischer substanz / darumb das es ist lufftig / vnd ein halb



halb spiritual Element / gleich wie das materialisch feur / vnd darumb dringet vnd gehet es durch alle dinge.

Vnd also seind drey Element spiritus / vnd das feur / vnd wasser seind zwey spiritual Elementa / aber der lufft ist ein ganzer spiritus / welchen man nicht greiffen noch sehen kan / Darumb so füret der spiritus die anderen in allen dingen / vnd auß allen dingen.

Vnd die Erde hat in ihr wasser vnd feur / dann durch die feuchtigkeit des wassers wirdt sie auff gelöset / gar subtil / vnd daher getheilet / dz sie den durch mag steigen vnd gehen alle vnempfindliche ding / welche die subtilheit der erden mit sich auff nehmen / vnd sich darurch corporieren / ein jeglichs nach seiner art vnd gestalt auß der vermengung vnd componierung der Elementen / als gras / holz / vnd andere frucht / vnd das feur muß sie alle erwärmen / daruñ das alle ding wachsen mögen / vñ sie müssen auch die fruchtbarkeit haben / denn alle ding so geberen

G iij



vnd frucht bringen sollen / die müssen  
warm vnd feucht sein / Dann die prima  
materia war die feuchtigkeit der Was-  
sern / welche da ist gewesen ein anfang/  
vnd die wurzel aller geschaffenen dingē/  
welches wasser in sich hat das viert Ele-  
ment vnder schidenlich in der ersten schöp-  
fung Gottes / vnd die lufft hat in ir was-  
ser vnd feur / darumb das sie das leben al-  
ler ding ist / dann on die lufft kan nichts  
werden / leben / noch wachsen / dann die  
lufft ist das leben aller ding / vnd die lufft  
ist geben vnd nemen einem jeglichen din-  
ge / das es zu viel oder zu wenig hat / als  
feuchtigkeit geben durch ire feuchtigkeit/  
vnd die feuchtigkeit zu nemmen durch  
ihre feuchtigkeit / Vnd also ist die Lufft  
das leben aller ding / vnd es ist das Ele-  
ment / so das sperma ist / in allen dingen/  
mit hülff oder vermittels seiner wörme  
vnd feuchtigkeit / denn das fort bringen  
soll / muß warm vnd feucht sein / Denn  
das Element der lufft ist ein subtiler spi-  
ritus / als auch die philosophi sagen / das  
dise



diser spiritus / mit seinem spiritual feur/  
das sperma in allen dingen / vnnd das  
Element der lufft gibt das leben / vnnd  
nimpts auch wider / vnnd der spiritus ist  
bey allen Elementen.

Vnnd also thut die erde nichts ohne  
wasser / noch wasser ohn lufft / noch lufft  
ohn feuer/vñ die drey Element/als was-  
ser / irde / vnd lufft / die ehren das vierte  
element/ das feur/ welches in den dreyen  
verbergen ist/dann das feur ist die natur/  
vnd die natur macht vnd tödtet alle ding/  
gleich als Gott solches tödtet/ vnd lebens-  
dig machet / also tödtet auch die natur/  
dann wo das feur der Natur bey ist / das  
selbig virdt lebendig/ vnnd wachset/ vnd  
vermehret sich in den dingen / ganz vols-  
kommenlich / vnnd wenn das Feur der  
naturwider entgeht/so stirbt es/vñ wirdt  
wider zur erden / vnd zu einem tödtlichen  
corpus / vnd das corpus der erden ist das  
medum, da sich die drey Element innen  
halten / vnnd ihre wirckligkeit volbrin-  
gen/nd wann das feur der Naturen das

¶ v



von scheidet / so scheidet auch die lufft/vñ  
das wasser der feuchtigkeit / vnd darnach  
so sterben die ding / von welchen die drey  
scheiden/ vnd welches von den dreyen be-  
gint oder anfahet zu scheiden / so ist ei-  
ner dem andern so gehorsam / vnd also in  
eins verbunden/das sie alle hinweg schei-  
den/vnd mit einander gehn/Dann ihrer  
keins kan vmb der perfection oder vol-  
kommenheit willen ohn das ander gesein/  
denn alles so perfect sein soll / muß durch  
die drey allzumal verbracht vnd erfüllet  
werden.

Ein Philosophus fragte / ob die erde  
feurig od' lufftig sein muß/ das sie frucht  
bringen möge? Antwort einer darauff/sie  
muß feurig vñ lufftig zusamen sein. Vñ  
also hat Gott der Almechtig ein jeglich  
ding in vier widerwertige vnderscheiden  
ding vnder dem himmel geschaffen /vnd  
außgetheilet/ welches vierte das feu ist/  
das in seiner eigen naturen allen dingen  
widerwertig ist / vñnd die widerwertig-  
keit kompt daher/wann die drey spiritual  
Eles



Element / eines in einem ding mehr oder weniger wirt / denn des dings eigenschafft ist / so wirt ein Zwitteracht der Elementen / welches mehr ist / das will regieren / vnnnd die anderen vnder drucken / welche vermehrung vnd vermindierung der Elementen geschicht durch die subtile wirckligkeit der lufft / die die feuchtigkeit oder hitzigkeit des feurs mehret oder mindert / darumb so gibt es vnnnd nimpt das leben in allen dingen vnder dem himmel / allen volkommenen vnd vnuolkommenen Creaturen / denn die vngerechtigkeit der eigenschafft eines jeglichen dinges / die kan die natur des feurs nicht vertragen / Dann das Feuer ist der Herz vnd richter vnder den Elementen / dann ohn des Feurs natur können sie ihren willen der wirckligkeit nicht volbringen / Darumb ist es dann / das die natur des feurs den willen der vngerechten Elementen / in den eigenschafften der dinge bricht / so scheidet die natur des feurs von einem ding / vnnnd wann es scheidet / so müssen



müssen die anderen mit jm scheiden / vnd stirbt darnach das ding / vnnnd wirdt ein todt corpus. Darumb so hat Gott der almechtig alle ding von anfang angetheilet / von dem meisten grad / biß auff den wenigsten / durch seine barmhertzigkeit / vnd gerechtigkeit / vnd hat ein natur geschaffen / ein substanz / ein ding / ein wesen / ist dreyfaltig / einig / inwendig / vnd außwändig / gleich wie der almechtig Gott in seinem wesen Dreyfaltig ist / also hat er auch zu seinen ewigen ehren vnd glorien diß wesen auch also geschaffen / dz es sich in drey gradus außtheilet / vnd diese drey theil sich zusamen halten / denn ein jegliche zustörung vnnnd geberung muß durch die theilen volbracht werden / vnd wird außgetheilet in drey gradus zu seinem lob vnd ehr / wie Gott dreyfaltig / vnd einig in seiner maiestat ewig in sich ist.

Vnd als nun die alten Weisen durch die gnade Gottes des heiligen Geistes dazu kommen / das sie die natur also erkennen / vnd den anfang aller geschaffenen



nen dingen / auß einer wurzel entsprun-  
gen / ersehen vnd erkanten / auch wie der  
allmechtig Gott die natur erschaffen hat/  
vnd wie ein natur mit der anderen ver-  
bunden was/ vnnd wie ein natur auß der  
andern wirt/vnd mit grosser ordinierung  
sich ein natur in die andern verferet/ vnd  
sich eine in der andern erhelt / als zů glei-  
cher weiß zů theilen 1. 2. 3. 4. welche zehen  
machen / so die zal zusamen gesetzt wirdt/  
von 10. 20. 30. 40. dadurch dann 100. sum-  
men/vnd von 100. 200. 300. 400. dadurch  
darnach 1000. summen vñ gemacht wer-  
den / vnd so nun das theil nichts anders  
ist / dann ein zůsamensetzung eines mit  
dem andern zů offenbaren/so ist es ein ge-  
gentheil/ aber so dasselb ein getheilt wirt/  
so ist es des andern theil / vnd so man das  
darnach noch ein mal theilet / dauon  
wechsft das drit theil/dz man 3. neñet/vnd  
so denn diß noch ein mal getheilet wird/  
dauon kompt vnd wirdt das vierte theil/  
vnd erfüllet 1. 2. 3. 4. also wirt eins auß  
dem andern getheilt auß dem einzellen/  
vnd



vnnnd den 10. vnd auß den 100. vnd auß  
den 1000.

Vand also hat Gott der almechtig  
auß der ersten materien / der schwebens  
den lufft / welche prima materia ein an  
fang / den obersten Thron des himmels /  
vnd die Engel / vnd darnach auß der ers  
ten materien der wassern / die vier Ele  
menta / vnd darnach alle Creature / durch  
die vier Element geschaffen / dadurch die  
alten Weisen erkenten / das die ganze züs  
samen setzung war inn allweg das subtil  
auß dem groben / vnd das subtil im gros  
ben verbunden war / vnd durch diß merck  
lich nachdencken vnnnd hohen fleiß / den  
die alten Weisen anwendeten / warde  
ihnen durch die gnade des heiligen Geis  
tes die gnade verilhen / dadurch sie übers  
kamen vnnnd funden ein wunderbarliche  
natur ober alle / vnnnd vnder allen übers  
schwencklichen gütthaten die Gott der  
Allmechtig vns armen menschen geschaf  
fen hat zü güt / vnd also durch den willen  
Gottes / vnnnd auch die natur also erkens  
nen /



nen/ das aller ding vrsprung/ von einem  
wesen herkommen war/ auß den alle o-  
bersten vnnd vndersten dinge ihren vrs-  
prung vnnd wesen haben / welches in  
anfang alles ein ding ist gewesen / wel-  
ches da ware die prima materia des ge-  
stübs der lufft/ welche prima materia sich  
verwandelt in wasser / welches darnach  
nach dem willen Gottes zu seinem lob/  
ehr / vnd würdigkeit in drey gradus auß-  
getheilet hat/ in lufft/ in wasser / vnnd in  
erde / vnnd ein jegliches hat sich in seiner  
art vñ complexion außgetheilet/ von dem  
wenigsten grad biß auff den meisten/ di-  
se drey außtheilungen oder gradus der  
drey geschlechten / als die lufft / das was-  
ser / vnd die erden / vnd allen natürlichen  
dingen/ mit ihren vmbstenden/ vnd nechst  
verbunden iren geschlechten / wie sie sich  
außtheilen / ein jeglichs nach seiner ge-  
staltnuß/ dauon alle ding sein/ vnd nam-  
men haben / von den qualiteten oder ver-  
mischung der vier Elementen / als das  
geschlecht aller Thier/ vnd das geschlechte  
aller



aller wachsender ding/ vnd das geschlecht  
Erde/ vnd ein jeglichs wechset/ vnd gene-  
rirt sich nach seiner art vnd gestalnuß  
der vermischung vnd qualiteten der vier  
ren Elementen / wie wir solches derglei-  
chen sehen/ Dann Gott hat allen geschaf-  
fenen Creaturen vnd naturen gebotten/  
vnd einem jeglichen freyhert gegeben/ zu  
wachsen/ vñ sich zu mehren/ das da allein  
geschicht durch die verborghenheit des  
feurs/ welches ist das viert Element/ das  
in den andern dreyn verborghen/ vnd vn-  
sichtig von Gott geschaffen ist / vnd kein  
ding inn der welt kan noch mag ohn die  
verborghenheit des feurs / des vierten E-  
lements/ welches da ist das feur/ bestehen.  
Vnd also haben sich die drey Elementa  
außgetheilt / vñnd ein jegliches hat bey  
sich behalten das feur / mit seiner verbor-  
ghenheit / welches da ist das mittel / vñnd  
das band/ darmit die Elementa zusamen  
gebunden werden / nach einer jeglichen  
vermengung irer composition / dardurch  
dann ein jeglich ding sich formieret / vnd  
schis



schicket nach seiner art vnnnd gestaltnuß/  
nach der vermengung der Elementen/  
lufftig/oder materialisch/ dadurch ein jeg  
lich ding darnach erkent mag werden/  
von was complexion der naturen es sey.

Der erste grad. Also hat sich zum ers  
sten das wasser außgetheilt/ welches war  
der erste grad / das hat sich in weg der na  
turen außgetheilet vom wenigsten grad/  
biß auff den meisten/ zu dem geschlechte  
aller wachsenden dingen/ als freuter/ bäu  
men/ korn/ vnd alle frucht/ kraut vñ gras/  
solches alles ward geschaffen durch das  
wort / da Gott sprach / die Erde grüne/  
vnd trage kraut das samē mache/ holz das  
öpffel trage / ein jeglichs nach seiner art/  
vnd gestaltnuß. Vnd dise ding sein alle  
von der natur des wassers kalt vñ feucht/  
vnd dis ist alles das / das auß der Erden  
wechst / ein jeglichs nach der ordinierung  
vnd willen der Göttlichen barmherzig  
keit / vnd die selbe ding vnd geschlecht als  
ler wachsenden ding/ die wachsen vnd ge  
nerieren sich mit zerstörligkeit irer selber

H



complexion der naturen / das ist darumb /  
das es Gott der Almechtig also geordie-  
niert hat / da er sprach / die saat sey in sich  
selbs / darumb muß man allzeit die saat /  
welches erdes wasser sich da hat corpo-  
riert / mit der subtilheit der erden / vnnnd  
hat die complexion seiner mütter der er-  
den / welche sie geboren hat / an sich ge-  
nummen. Darumb muß man sie wider  
werffen in die erden der feuchtigkeit / da  
werden sie rein von ihrem coagulierten  
öle / des samens körper wider eingeworfs-  
fen / vnd durch die werm vnd feuchtigkeit  
der erden / des mütterlichen bauchs / wer-  
den die coagulierten element widerumb  
entlassen / oder wider auffgelöst / vñ vmb  
ihrer reinigheit willen ist ihre krafft desto  
größer / vnd nemen hernach eben seines  
gleichen zu sich auß dem bauch der müs-  
ter der erden / vnd also wirdt vermehret  
ein körnlein in 100. körnlin / vnd des glei-  
chen alle andere ding der jrdischen fruch-  
ten / vnd also verstorret es sein selbs com-  
plexion / kalt vnd feucht / welche sich hel-  
tet auff



set auff beiden teilen/ des luffts vnd auch  
der erden/ ein jeglichs nach seiner art / vñ  
gestaltnuß/ das dann auch durch die ober-  
ste regierung in dem Cirkel des firmas-  
ments vmbblauft / wechßet/ vñnd sich ver-  
mehret.

Der ander grad. Item zu dem andern  
mahl / so hat sich der lufft in dem wege  
der naturen außgetheilet von dem wenig-  
sten grad/ biß zu dem meisten/ zu dem ge-  
schlecht aller thieren / vñnd zu allem dem  
jenigen / welches thierlich vnd natürlich  
ist / welche da alle sein von der natur der  
lufft/ warm vnd feucht/ als die vögel/ vnd  
vierfüßige thier / das gewürm / die fisch  
in dem wasser / vnd empfangliche leben-  
dige ding/ vñ auch die menschen/ jeglichs  
nach seiner art vñnd gestaltnuß seiner  
form/ ein jeglichs nach dem willē vnd ordi-  
nierung der Göttlichen barmherzigkeit/  
wie dann das darnach geschaffen war/  
durch diß wort / da Gott sprach / Es rege  
sich das wasser mit lebendigen vnd bewe-  
genden thieren / vñ mit geuögel das auff

¶ ij



erden vnder dem Firmament des him-  
mels flouget / vnd die erde bring erfür le-  
bendige thier / ein jeglichs nach seiner  
art vnd gestaltuß / vihe / gewürm / vnnd  
thiere / ein jeglichs nach seiner art / 28. vnd  
dieselbige geschlecht aller Thieren wach-  
sen vnnd vermehren sich ohn alle zerstös-  
rung / vnnd solches geschicht vmb der Ed-  
len Substantien subtilheit willen der na-  
tures des Luffts / warm vnd feucht / wel-  
che lufftige Element der Thieren nicht  
gewinnen haben / oder nehmen die grüne-  
heit der corporischen erden / daruñ Gott  
der Almechtig die complexion der natu-  
ren also gefreiet hat / vnd in den zweyen /  
als warm vnd feucht / ist die natur des le-  
bens / durch welche zwo qualiteten alle  
ding leben vnd sein im wesen / das alle  
ding thun wachsen / denn ohn die ist kein  
wirkligkeit / weder in volkommenen noch  
vnuolkommenen dingen / vnd von was din-  
gen die werme vnd feuchtigkeit abschei-  
det / so stirbt vnd vergehet das selbig ding /  
vnd darumb vmb der warmen vnd feuch-  
ten na-



ten naturen willen die Gott also ordiniret vnd geschaffen hat/ durch sein ewiges wort / in der prima materia, welche auch nichts anders war dann ein warme lufft/ als ein athem des menschen / darumb so mögē alle lebendige thier wachsen durch ihre eigene krafft die im Gott gegeben hat/ vnd sich vermehren / ohn alle verdestruirung ihrer selbs complexion vnd qualiteten der naturen / vnd diß allein geschicht in der edelheit der spiritual lufft der Naturen/ die da ist warm vnd feucht/ die daß auch durch die oberste regierung in dem Circel des firmamēts umblauffet / wachset/ vnd sich vermehret / ein jeglichs nach seiner gestaltuß seiner form / nach der complexion der Elementen/ vnd qualiteten der naturen wirckligkeit / Es sey von den wassern oder von der lufft / oder von der erdē / welches der mensch ein jeglichs eins für dem anderen kennen kan/ die die natur kennen vnd weiß.

Der dritte grad im dritten grad / welches da ist die Erden/ die hat sich auch

H iij



im weg der naturē außgetheilet von dem  
wenigsten biß auff den meisten zu den  
Ehrlichen geschlechtē/ das ist/ alles so in-  
wendig in der erden ist / als die Metalla/  
vnd alles das jrdischer art / als sulphur,  
Vitriol/ Salpeter/ Alaun/ Salz/ Lasur/  
vund dergleichen / die alle seind von der  
naturen der erden kalt vnd trucken / vnd  
ein jeglichs wechsset vnd generieret sich in  
die dieffe der inwendigkeit der erden/ ein  
jeglichs nach seiner art vund gestaltnuß  
seiner componirung vñ vermengung der  
jrdischen Element durch den willen vnd  
ordinierung seiner Göttlichen barmher-  
zigkeit vnd gerechtigkeyt / das dann auch  
alles geschaffen wirdt in der naturen der  
erden/ durch sein Göttlich ewig wort/da-  
rumb da Gott sprach/die erden werd grü-  
nen/vnd dise geschlecht wachsen vnd ver-  
mehrten sich auch on verdestruirung ihrer  
selbs componirung der naturen / das ist  
vmb der gleichen sehr einformig der jr-  
dischen Elementischen componirung der  
naturen / vnd sich so gleichformlich ver-  
mengt/



mengt / verbunden vnd gekocht hat / ver-  
 mittels der selten truckenheit / mit langer  
 zeit in dem bauch der mütter des erdrichs /  
 welche kochung geschieht durch hilff vn-  
 sers Vatters / der Sonnen wirckligkeit /  
 noch der letzten kochung in dem mitteln.  
 Die letzte kochung / das ist / ehe sich die an-  
 gezogene feistigkeit der feuchtigkeit der  
 erden / welche die Sonne außgezogen hat /  
 welches da war die erste kochung / vnd  
 die letzte kochung ist / das die sonne die sel-  
 bige feuchte feistigkeit gecoaguliert hat  
 in eine harte fixe materien / welche letzte  
 kochung mag man nicht verdestruieren /  
 Dann der Allmechtig Gott hat die com-  
 position diser Irdischen naturen also ver-  
 sehen / das jr erster anfang wachset / vnd  
 vermehret wirt durch die componierung  
 der Irdischen complexion / kalt vnd truck-  
 en / dann die erde ist nichts anders dann  
 ein coaguliertes wasser auff der grünig-  
 keit der elementen / vnd hat also Gott der  
 Allmechtig geschaffen ein jeglich mate-  
 rialische Substantien der Irdischen



dingen / in dem bauch der erden / durch  
hilff der sonnen werme vnd kochung / vnd  
mit der mitwirküg oder wirkligkeit der  
andern planeten / dauon alle dise drey ge-  
schlecht ire natur vnd narung empfan-  
gen durch die Obersten influens ihrer  
wirkligkeit vñ regierung in dem Cirkel  
des firmaments vmbauffet / wachset vnd  
sich vermehzet / vñnd ist gewachsen fort  
vnd fort / biß auff dise zeit.

### Die vierte wirkung Gottes.

**I**n diser wirkung sprach Gott / Es  
werden liechter an der festen des  
himmels / vñnd scheiden tag vñnd nacht /  
vnd es sein zeichen / zeiten / tage vñnd jar /  
vñ sein liechter an der feste des himmels /  
das sie scheinen auff erden.

In diser vierten wirkung schüff Gott  
die himlische corpora, von der quinta es-  
sentia des himmels / welche corpora sein  
die stern der zwölff zeichen des himmels /  
vñ andere stern / vnd die Planeten / alle di-  
se stern



se stern sein corporisch essentia, vnnnd das firmament des himmels vnderscheidet sich in neun gezeichende vnderscheidenliche theil / welche theil vber einander geschlossen sein / als wie ein dotter in einem Ey / in welchen neun himmeln oder vnderscheidenlichen theilen Gott der almechtig die zeichen / stern / vnd Planeten / vnd die zwey grosse Liechter sakte.

Vñ das grosse Liecht vnder den zweyen grossen Liechtern / das ist die Sonne / die solt regieren den tag / vnd das kleinste Liecht vnder den zweyen grossen Liechtern solt regieren die nacht / welches ist der Mon / vnd sie sollen scheinen auff erden / vnd den tag vnd die nacht regieren / also hat Gott gezieret den Himmel mit den himlischen corporen vnnnd stern / den Planeten / vnd den zweyen grossen liechten / welche tag vnnnd nacht so schön scheinen / vnd seind vil schöner vnd klarer denn der himmel ist / vmb der feurigkeit willen der quinta essentia, welche der masculus ist / vnd der himmel die foemina / vnd daruñ

¶ v



hat Gott der Almechtig durch seine ewige  
weißheit die erde in dz mittel des firma-  
ments gesetzt / auff das die oberste corpo-  
ra durch die bewegung ihres vmbblaußs  
ire wirkung vnd influentias in die erden  
haben könten / deßgleichen in allen Crea-  
turen vff erden / empfenglich vnd vnem-  
pfenglich / auff das sie solche wirkung ent-  
pfahen / vnd derselbigen solten theilhaff-  
tig sein / vnnd auch darumb / daß die ver-  
nünfftige Creaturen / nemlich der mensch  
solcher wirkung wol acht nemen möch-  
ten vnd erkennen / vnd sich also nach zeis-  
chen / zeit / tag vnd jar recht halten / vnnd  
Dessen ein wissenschaft haben möchten /  
vnd in disen dingen hat Gott der almech-  
tig geschaffen allen verstendigen dingen  
einen vatter vnd ein müter / welcher vater  
ist die Sonne / vñ die müter ist d' Mon /  
durch welche zwo krafft vnd wirkligkeit  
der Sonnen vnd des Mons / die erde vñ  
das wasser ihre sperma vnnd natur fort-  
bringen / denn Gott der Herz hat in allen  
seinen wege der geschöpffnuß seine barm-  
herzig



herzigkheit vnd warheit bewisen/ das die  
ganke zusamen saking alle der welt/ es  
sey die grosse/ mittel/ oder kleine welt/ ist  
nicht mehr dann eine zusamen saking/  
darum ist vnmöglich natürlich zu reden/  
das der himmel seine wirckligkeit vff dise  
vnderste welt nit solte haben.

Darumb hat vnser Vatter Hermes  
durch die eingebung Gottes des heylis-  
gen Geystes / wol propheteet / vnd die  
warheit / da kein zweifel an ist / gesaget/  
das dise vnderste ding die wir menschen  
sehen vnd greiffen / vnd alles das verbor-  
gen von Gott geschaffen ist/ mit den ober-  
sten Himmelschen dingen vberlein kom-  
men / vnd auch herwiderumb das oberst  
himlische wesen / wie es Gott geschaffen  
hat / kumpt mit disem vndersten vberlein/  
vnd werden von disem obersten regieret/  
nicht das die vndersten des gleichen ge-  
gen den obersten regieren/darum ein jeg-  
licher stern an dem himmel sein influentz  
vnd eigenschafft auff der erden hat/das  
durch die ding auff der erden nach dem  
selben



selben stern sein influenß vñ eigenschafft  
hat/darnach es von Gott also geordiniert  
ist / vñd das mag man glaublich halten/  
das vñder dem gestirn der bildnussen an  
dem firmament des firmaments des him  
mels / zñ den dingen auff der Erden  
einfließen / dazu sie von Gott dem All  
mechtigen geordnet sein / vñnd ihre bil  
dung vñd form geben dem menschen / vñ  
allen Creaturen. Wo von kumpt es/das  
ein mensch lang ist / der ander kurz / der  
tritt dick / der viert dünn / der ein hat ein  
solch angesicht/der ander ein anders? vñd  
dergleichen auch also mit allen anderen  
Creaturen/ daß Gott hat kein vergebens  
ohn vrsach geschaffen. Gleicher weiß ist  
ein stein genant volus, der regiert vber  
den stein Adamant/ vñ Adamant regiere  
vber den Magnet / der Magnet vber das  
Eisen / deßgleichen der Mon vber die  
wasser des Meers/ Die Sonn vber alles  
das in der welt ist / dann sie der oberst  
Planet an dem himmel / dann alle stern  
vñnd Planeten in dem himmel nemmen  
ihre



ihre krafft von der Sonnen / vnd die Sonn  
ist ihr hertz / vnd die menschliche bildung /  
die stern am himmel die geben ihre influ-  
entias auff die corpora der menschen / vñ  
die bildung der heusern am Gestirn am  
himmel geben ire influentias, vnd domi-  
nieren vber die Thier der erden / vnd die  
andere vber die frucht vnd freuter der er-  
den / vñnd darumb ist ein solcher grosser  
anhangender leib zwischen den himlia-  
schen corporen / vnd den Irdischen corpe-  
ren aller wesender ding / das ein jegliches  
sein ordinierung nach dem es von Gote  
geschaffen ist / begeret zu volbringen / Also  
Aristoteles spricht / das der himmel ehe  
solte brechen / ehe Gott das solt geschehen  
lassen / das die natur in diser welt solt ge-  
brechen haben oder leiden / Darumb hat  
Gott der almechtig das gestirn geschaf-  
fen / das sie ire wirckligkeit vnd influent-  
auff die vnderste ding haben sollen / Wel-  
ches gestirn alle seine krafft von der Son-  
nen nimpt / vnd die Sonne ist der oberste  
vnd höchste Planet an dem himmel / vnd  
ist ein



ist ein Herr alles gestirns/ vnd dominiert  
auch vber alles das auff erden vnd in der  
erden ist/ vnd die Sonne behelt alle ding  
in wesen vnd krefften/ behütet es/ernew-  
ert vnd erleuchtet es ganz vnd gar/dann  
durch ihre hitz ernewert sie das erdtrich/  
also/ das die selbe werm eins theils in der  
inwendigkeit der erden bleibt/ vnd so sie  
dañ auffsteiget vber die erden/ findet sie  
die werm in dem erdtrich verborzen/ vnd  
begeret ein gleiche werm der andern na-  
türlich auffzusteigen mit der werme/ die  
sie empfangen vnd beschlossen hat in der  
erden/ vnd wann sich dann ein theil was-  
fers mit der werme in der dieffe der Er-  
den vermengen hat/ so verkert es sich daß  
in ein dunst/ welcher dunst natürlich be-  
geret auffzusteigen vnd auffzüklimen/ so  
die geistliche werme darzu geführet  
wirdt/ aber so die Sonne wider zu dem  
Nidergang gehet/ so nimpt die selbe ge-  
schickligkeit der werm widerumb abe/ die  
weil wirdt der selbig dunst/ widerumb  
dick/ vnd steigt widerumb zu dem ihre/  
vnd



vnd so darnach die Sonn widerumb auffsteiget / vnd ihre werm widerumb kumpe in das erdtreich / vñ seins gleichen suchet / wie vor / vnd zum letzten ist es ein dunst / also arbeitet die sonn fort vnd fort / höree nicht auff sich zu sublimieren vnd zu distillieren / so lang / biß die ganze öligkeit die werm in der erden ist zerlassen / vnd sich mit dem wasser ganz vermengert / das es ein materia vnd sperma / oder ein samen wirdt aller wachsenden dingen vnd geschlechten / in dem corpus der erden / vnd nach manigfaltigkeit der vermengten Element werden auch mancher hand are vnd gestaltnuß der Irdischen dingen in der erden / vnnd auß der erden gebracht / vnd ihr materia ist in sich allein nur ein natur / das ist / durch die Wirkung der werm / vnd die sonne ist der foch / die es alles fochen muß / vnd sie fochet auch auff einem ende besser als auff dem andern / sie scheint auch an einem ort besser den am andern / vnd darumb hat die sonne auch mehr krafft an einem ende / dann am andern.

Also



Also ist die Influentz vnd wirckligkeit  
des himmlische Gestirns ein eingang zu  
diesen vndersten dingen der Erden / ein  
jeglichs nach seiner Complexion vnd na-  
tur / nach der manigfaltigen vermägung  
der Element / nach dem / wie es dann  
von Gott geordnet ist / denn ein jeglichs  
volget den dingen / vnd hat ein auffsehen  
zu dem jenigen das er lieb hat / vnd im zu-  
geeygnet / also ist es natürlich / das es  
ein gedencen hat / zu gleicher weis als  
ein mann allzeit gedanken hat / vnd an-  
hengeret dere die er lieb hat / vnd gleich als  
der hunger anhanget der koste / vnd der  
durst verlangen hat nach dem trincken /  
also ist auch all zeit mit den influentien  
des gestirns / vnd der Planeten / dann sie  
hangen allzeit an / vnd haben das einflie-  
sen zu allen dingen / inn vnd auff erden /  
der Elementischen natur / als einem jeg-  
lichen geben ist / vnnnd darzu so haben sie  
alle hunger vnd durst / wie ihr gehört habt /  
in der gleichnuß.

Darumb alle Creaturen / Es sey stein  
oder



oder wasser / freuter vnd wurzel / Thier /  
welcher geschlecht er sey / deßgleichē auch  
die menschen / jeglichs besonder ein eigen  
influentiam hat von dem gestirn / zu den  
complexionen der creaturen vñ naturen /  
die an sich haben / vnd jhr eines dem an-  
deren nachfolget / Anima, allein d' mensch  
heit influentiam von dem gestirn / zu gū-  
ten vnd bösen sachen / das ist durch mittel  
des geists / welcher geist da ist von dem  
Element der lufft / welcher da ist erwe-  
cken die Sünd in den menschē / daß durch  
mittel der Elementischen geistlichen luff-  
ten / welche ein theil schweben durch die  
reine klare lufft / dauon die gūten Engel  
seind / durch hilff vnd mittel der vermēn-  
gung der Elementischen geistlichen luff-  
ten / welche ein theil schweben durch die  
reine klare lufft / dauon die gūten Engel /  
durch hülff vñnd mittel der vermēgung  
der Elementischen lufftigen geisten / so  
vnder dem himmel ist / vñnd ist der geist  
des lebens / vnd die Seel aller vernünfft-  
tigen thieren / vnd aller vnempfindlichē

J



Creaturen / vnd in dem geist operiert die  
influentia des himmels.

Vnd Gott der Allmechtig hat dem  
menschen ein sonderliche gnad geben für  
allen andern vnuernünftigen Creatu-  
ren vnd Thieren / das ist sein eigen will/  
welcher will ist die seel des menschen / vnd  
der wille ist eins von den dreyn krefftien  
der Seelen / welcher eigen will soll den  
Menschen ordinieren zu guten wercken  
vnd willen / darumb der mensch die böse  
werck vnd willē / welcher da ist der mate-  
rialische geist / will vnd anziehung löst / vñ  
die gute werck vnd will der Seelen / wels-  
cher da ist die sechste essentia, vnd das ist  
nicht in anderen Creaturen / darumb sein  
vns alle andere Creaturen vnderthan /  
denn hette Lucifer mit seiner gesellschaft  
die sechst essentiam ohn vermengung des  
lufftigen Elementischen spiritus / wels-  
cher war die unreine lufft / so hette er nie  
gesündiget / oder sünde gethan / Darumb  
so folget ein jegliche Creatur nach der  
influentia die dahien gehet / durch die  
empfa-



empfangung vnnnd eingeben des geistes /  
welche da die influentien mit sich fñs  
ret. Auch so haben die Stern influentien  
an einem jeglichen gelide / an des men-  
schen leib / als zñ dem haupt / zñ dem halß /  
vnd zñ allem das der mensch hat / vnd die  
siben Planeten die regieren die ganze  
welt / vnd die Sonne ist der Oberst vnd  
mechtigste planet / vnd der Vatter / vnd  
der Mon die Mñter / vnd die Sonn stehe  
mitten oder in mittel der Planeten / vnd  
theilet iren schein vnder sich vnd vber sich  
in berg vnnnd thal / vnnnd die Sonn ist ein  
feur / scheinet an allen enden / vnd erwer-  
met vnnnd erleuchtet alle ding / denn der  
tag ist anders nicht / dann ein glantz vnd  
schein der Sonnen / vnnnd alle tag seind  
nicht mehꝛ denn ein tag / vnd seind den-  
noch siben tag genent / nach den siben pla-  
neten / vnd die Sonn gibt den siben Pla-  
neten alle ire krafft / vnd dadurch sein die  
Planeten auch herren der welt.

Vnnnd darumb hat Gott der almech-  
tig durch die influentiam die siben plane-

¶ ij



ten geschaffen/vnnd geschicht sibem Me-  
tallen/als bley/zinn/eisen/gold/kupffer/  
quecksilber / vnd silber / die alle fort ge-  
bracht werden / durch die kochung der  
Sonnen / vnd durch die influentias der  
andern Planeten. Als Saturnum hat  
Gott geordiniert zum bley / vnd das bley  
hat sein eigenschafft / vñ wirt Saturnus  
geneniet. Joue hat Gott geordiniert zum  
zinn / denn das zinn hat Gott in aller ei-  
genschafft geordiniert als Jouem / vnnd  
darumb wirdt das zinn Jupiter genent.  
Martem den hat Gott geordiniert zum  
eisen/ dan das eisen hat alle eigenschafft/  
gleich wie Mars/ darumb es auch Mars  
geheissen wirdt/vnd durch den Planeten  
Sol/so der aller edelst ist vnder allen pla-  
neten/den hat Gott geschicket vnd geordi-  
niert zu Gold/denn Gold hat alle eigens-  
schafft wie die Sonn / darumb wirdt das  
Gold Sol genennt/vnd durch den plane-  
ten Venus hat Gott das Kupffer geord-  
niert / denn Kupffer hat alle eigenschafft  
als Venus / darumb auch das Kupffer  
Venus



Venus genent wirdt. Vnnd durch den Planeten Mercuriū hat Gott geschickt vnd geordiniert das quecksilber / daß das quecksilber hat alle eigenschafft / wie dann der planet Mercurius / vnd darumb wirdt das quecksilber Mercurius genent. Vnd durch den Planeten Lunam hat Gott geschickt vnd geordiniert das silber / daß das silber hat alle eigenschafft wie Luna / vnd darumb wirdt das silber Luna genent.

Vnd Luna ist ein mäter / vnd regieret die wasser / dann wann Luna auff gehet zu scheinen / so beginnet das Meer auff zu steigen / vnnnd wann der Mond kumpt an der Sonnen vndergang / so fchet es an wider auff zu steigen / vnnnd so der Mond kumpt an den vndersten lauff / so fchet es wider nider / vnd also wann er wider vernewert wirdt / so thut das Meer gleich wie vor / also geschicht es alle tag / daß das Meer auff vnnnd nider steigt. Solches geschicht dennoch nicht / wann die Sonn auff vnd nider gehet. Darumb ist zu mercken / das dises allein geschicht durch den



Monnd / welcher ein influentiam hat der  
wassern / vnnnd vber die selbe dominiert/  
vnd die wasser vnd das Meer des Mons  
influens in sein regierung nimpt / vnnnd  
empfalet / sein sie dem Monnd gehorsam/  
von wege der Ordinierung des Allmech-  
tigen Gottes / der alle ding nach seiner  
Göttlichen weißheit geordinieret vnd ge-  
schaffen hat / vnnnd also wirket auch die  
influentia des himmels in den spiritibus  
des menschen / dann der spiritus der men-  
schen ist von der complexion der himli-  
schen naturen / vnd so der Mon new zü-  
nimpt / desto weniger nimpt sie an der  
hizen abe / vnnnd wann es in der Ersten  
vnd letzten coniunction ist / je wermier die  
Sonn ist / wann aber der Mon in der op-  
position oder vol ist / So scheint die  
Sonn am aller feltesten / vnnnd darumb  
wann der Mon zü nimpt / so scheint er  
vor mitter nacht / wann er aber vol ist / so  
scheinet er vor vnd nach mitter nacht / die  
ganze nacht vber / wann er abnimpt / so  
scheinet er nach mitter nacht / vnd der tag  
ist ein



Ist ein scheidung des Mons / vnnnd die  
scheidet durch die Sonnen / welches ist  
die kelte vnd feuchtigkeit des Mons.

### Die fünffte Wirkung Gottes.

**I**n diser fünfften Wirkung sprach  
Gott / Es erzege sich das wasser mit  
webenden vnd lebendigen thieren / vnnnd  
mit Geuögel das auff der erden vnder  
dem firmament des himmels fleuget. In  
diser fünfften Wirkung schaffet Gott  
grosse Walfisch / vnd allerley thier das da  
lebt / vnd webet / ein jeglichs nach seiner  
art / vñ allerley gefiederts geuögel von den  
lufftigen Elementen / ein jeglichs fort zu  
bringen sein art vnd gestaltnuß / vñ Gott  
segnet sie vnd sprach / seiet fruchtbar / vnd  
mehret euch / vnd erfüllet das wasser im  
Meer / vnnnd das geuögel mehre sich auff  
erden. Also hat Gott der Almechtig das  
wasser mit den lebendigen bewegenden  
dingen der Fisch / welche in dem wasser  
sein / begabet vnd gezieret / vnnnd die luffte

**I** iij



vnd erde mit den lebendigen dingen der  
vögel / vnnnd allem gethier auff der erden  
begabet vnd gezieret. Solches Gott als  
les' geschaffen hat / vmb der grossen be-  
girlichen lieb willen / die er zü dem men-  
schen het / darumb das sich der menschen  
leben auß vnnnd von der complexion der  
vieren Elementischen lieblichen natur  
könte auffenthaltten / also / das ein leben-  
diges das ander muß enthalten / darumb  
das sie beyde von dem lebendigen wesen  
seind / als von den Materialischen luff-  
ten der reinen Elementen / dann ein jeg-  
liche complexion der Naturen der andern  
dergleichen ein narung vnd auffenthalt-  
tung ist / vnnnd das ist / vmb der subtilen  
auftheilung willen / die da geschehen ist /  
durch die wirkung der naturen / welche  
auß den vieren Elementen alle dinge  
der Creaturen außgetheilet vnd verbun-  
den hat zü einer bequemligkeit vñ narung  
der auffenthaltung des menschlichen le-  
bens damit zü behalten / nach der ordina-  
tion vnd willen des almechtigen Gottes.

Daa



Darumb ein jedes das menschlich ist/  
ist schuldig Gott höchlich zu dancken/ als  
zeit danckbar zu sein/ vnd Gott zu erken-  
nen für seinen Vatter/ dadurch auch ein  
mensch mit recht Gott gehorsam ist/ dan  
alles das da ist/ vnnnd das wir haben/ das  
haben wir alles von Gott/als man hierin  
in disem büchlin wol hören thut/ wie vnd  
was vnd waruon alle ding kónnen seind/  
demselbigen Gott sey lob vnd ehre/ vnnnd  
dancksagung nun vnd zu allen zeiten.

### Die sechste wirckung Gottes.

**I**n dieser sechsten wirckung Gottes/  
sprach Gott/ die erde bringe ersúr le-  
bendige thier/ ein jeglichs nach seiner art/  
vihe/ gewürm/ vnd thier auff erden/ ein  
jeglichs nach seiner art/ vñ also hat Gott  
der almechtig die erden mit den lebendi-  
gen schönen thieren begabt vnd gezieret/  
vnd mit vnzéhlichen dingen der grünen  
freutern/ mit den biren/ ópffel/ vnd ande-  
ren frúchten der Irdischen gestaltnuß.

**I** v



Vnd Gott sprach / Laßt vns menschen  
machen / ein bild das vns gleich sey / die da  
herrschen vber die fisch im Meer / vnd v-  
ber die vögel vnder dem himmel / vnn-  
d vber das vihe / vnd vber die ganze erden /  
vnn- d vber alles gewürm das auff Erden  
freucht / vnd Gott der almechtig machet  
den menschen auß dem erden flos / welch  
Erde war von acht stücken oder substan-  
tiē / welcher flos vñ erdē war ein außzug /  
die subtilheit d' vier elementē von dē vier  
elementē der erdē / welche subtilheit war  
vñ sibē substanz / die erste substantia war  
von dem gesteyß der ersten materiē / die an-  
der Substantia war wasser des Meers /  
das dritte war von den steinen der Er-  
den / das vierte war von den wolcken des  
himmels / das fünffte war von dem win-  
de / das sechste war von der Sonnen / das  
sibent war von dem Mon / vnd also ma-  
chet Gott den menschen nach seinem bil-  
de vnd gleichnuß seines Göttlichen bil-  
des vnd volmachtes / leßlich mit dem ach-  
ten stuck / als da Gott jm einbliese einen  
lebens



lebendigen athem in sein angesicht / welches da war der heilige Geist / dardurch der mensch in das ewig leben gemacht wurde.

Vnd Gott der Herz bauet einen garten in Edem / das Paradeiß des wolusts von anbegin / darein setzt er den mensch / vnd Gott der Herz ließ auff wachsen auff der erden allerley fraut vñ bäume / lustig anzusehen / vnd gut zu essen / vñnd sprach zum menschen / Sihe / ich hab euch gegeben alles das fraut bringet / vnd safft / auff der erden / vñnd alles das holz so da hat den samen jres geschlechts in sich selber / das sie ewer seien zu einer speiß / auch alle lebendige Thier der erden / in welchen da ist die lebendige Seele / auff das ihr alles habt zu essen / vnd bracht ihm darnach das holz des lebens in das mittel des Paradeiß / welches da war das holz des erkentnuß des guten vnd bösen / das der mensch das Paradeiß bauete / vnd bewarete / vñ der Herz gebott ihnen / vnd sprach / du solt essen von allerley bäumen im gartē / aber  
von



von dem baum des erkantnuß gütes vnd  
böses soltu nicht essen / dann welches tag  
ges du dauon issest / wirst du des Todes  
sterben / vnd Gott bracht für Adam aller  
ley thier der erden / vnd allerley vögel vnder  
dem himmel / das er sehe wie er sie  
nennet / dann wie der mensch alle lebens  
dige thier nennen wurde / also sollten sie  
heissen / vnd der mensch gabe einem jegli  
chen vihe vnd vogel vnder dem himel / vñ  
thier auff demfelde seinen nammen / a  
ber Adam hette keinen gehülffen der ihm  
gleich war / vnnd Gott sprach / es ist nicht  
güt das der mensch allein sey / wir wollen  
im einen gehülffen machen / die im gleich  
werde / da ließ Gott der Herz einen diefs  
sen schlaff fallen auff den menschen / vnd  
er entschlief / vnd name seiner rippen ei  
ne / vnnd schluß dieselbige stette zu mit  
fleisch / vñ Gott der Herz bawet ein weib  
auff der rippe die er vom menschen nam /  
vñ bracht sie zu im / da sprach Adam / dz ist  
doch bein von meinē beinē / vñ fleisch von  
meinē fleisch / man wirt sie männin heis  
sen /



sen / darumb / das sie vom mann genom-  
men ist / darumb wirdt ein mann seinen  
vatter vnd müter verlassen / vnnd an sei-  
nem weib hangen / vnnd sie werden sein  
ein fleisch / vnd Gott der Herz segnet sie /  
vnd sprach / seid fruchtbar / vnnd mehret  
euch / vnd füllet die erden / vnd machet sie  
euch vnderthon / vnd herrschet vber fisch  
im Meer / vnd vber vögel vnder dem him-  
mel / vnnd vber alles thier das auff erden  
freucht / vnd Adam vnd Eua waren bei-  
de nackent / vnd schemeten sich nit.

Vnd sie waren die wurzel / vnnd ein  
blüm gutes vnnd böses / all gleich hieher  
in dem mittel auß allen dingen seind sie  
geschaffen in ein ding / Menlich vñ frew-  
lich / dann Adam der erste mensch ist hie  
geschaffen gleich von allen Elementen /  
güt vnd böß / in ein stück / vnd das böse ist  
in sich allein worden / güt / durch mittel  
groß leiden / das er gedultig getragen  
hat / vnd darumb hat Gott Adam wider  
verfletet in ein Göttlich wesen / mit allen  
seinen kindern / die jm gleich mögen nach  
thun



thun / welches besser ist dann er / das ge-  
hört in den obersten Chor der himmel heer/  
als darnach sie gut sein / vnd was böser  
ist dann die selbige / das gehöret in den  
vndersten Chor der hellen/ je dieffer vnd  
dieffer/je böser sie seind.

Als nun Gott in seinem wesen Tris-  
faltig ist / also hat er auch zu seinen ewi-  
gen ehren vnnnd glorien geschaffen / auch  
also/als in ein corpus spiritum vnnnd anis-  
mam, vnnnd die anima kompt vom Him-  
mel / der spiritus von dem Lufft / vnd das  
corpus von der Erden. Als zum ersten  
wirdt das corpus des Menschen gespeiset  
von dingen der vier Elementen auß der  
speiß von den fruchten/ durch die verden-  
ung des menschen natürlichen essens vñ  
drinckens/ dauon der Mensch lebet vnnnd  
seine narung hat / denn die narung vnd  
speiß die menschliche natürliche wirkung  
auß thut/die so die aller Edelste vnd sub-  
tileste krefft von den vier naturen der  
vier Elementen / welche ganz gleich ver-  
menget vnnnd vermischet werden in ein  
substanz/



substanz/ mit hülff der mitteln natur des geistes der im menschen ist / denn der spiritus ist bey allen Elementen der gangen welt/ mit der mittel natur/ welches ist das verborgen spiritual feur/ so da ist das sperma/ vnnnd die natura generatiua, welches Element der lufft / der natur spiritui das leben gibt vnnnd nimpt in allen dingen der welt.

Vnd die substantia der menschlichen natur vnd sperma/ ist ein warme spermosa feuchtigkeit / welche durch hülff der natürlichen begirlichkeit vnd Wirkung des mannes vnd frauen abgetheilt wirt/ vnd in sich beiden ist die selbige Substantia/ Mänlich vnnnd frewlich / welche materia ist generatiua warm vnd feucht/ dann alles was geberen soll / muß feucht vnnnd warm sein / vnnnd gebürt eins das ander/ vnd so bald die Wirkung geschicht / so ist der Mann wider für sich/ auch die Frau allein für sich / vnnnd wann denn die 24. ding zusamen kummen / so wirdt darauff ein mirackel zu sagen / denn nit vil Menschen  
sehen



sehen können wissen noch verstehen der  
Elementische natur wirklichkeit/ darumb  
sagt man in gemein/ der mensch ist von  
der erden gemacht/ vñ soll auch wider zur  
erden werden / Ja Gott hat den Adam  
vom schleim der erden/ aber Adam hat  
vns gemacht im andern grad hernach/  
welches da ist ein schleim d' menschlichkeit/  
darumb werden wir menschen nun von  
den menschen/ vñ nit auß erden gemacht/  
wiewol der vrsprung ist auß den vieren  
Elementen/ vnd die componierung der  
menschen körper ist die subtilheit der vier  
Elementen/welche subtilheit auch so wol  
die acht stück oder substantien in ihr hat/  
von welchen Gott Adam gemacht hatte/  
von der subtilheit der vieren Elementen/  
des himmels vnd der erden/ vnd darumb  
werden wir auch durch die vier Elemente  
des himmels widerumb gebrochen vñ  
verzeer/ also seind alle ding von den vier  
Elementen/ so vnder dem Himmel  
seind/ vñ das soll auch wider also ver-  
zert werden/ Dann Gott tödtet vñ macht  
leben



lebendig/ Also thut auch die mittel natur/  
die macht alle ding vnder dem himmel/  
vnd bricht es wider / darumb ist alle ding  
vergenglich / das vnder dem himmel ist/  
von allein die Göttlich natur / mit irer na-  
türlichkeit / die solle bleiben / welche da ist  
im himmel vnd der Erden / durch sein  
Göttlich Ewig Wort / das er selber ist/  
durch welches er alle ding / den Himmel/  
vnd was in dem Himmel ist / die Stern/  
vnd die Planeten / vnd die vier Clemen-  
ta / das in der Erden / vnd auff der Erden  
ist / geschaffen seind. Darumb hat Gote  
gesprochen / alle ding sollen vergehn auff  
Erden / aber mein Wort soll nicht ver-  
gehn.

Vnd als nun die materia das sper-  
ma / ein dieffe Substanz / in dem schrein  
des freundlichen Leichnams beschlossen  
ist / darinnen es gekocht / vñ in ein massam  
coaguliert wirdt / wirdt es von Gott mit  
der ersten wirckligkeit begabt / Den Gott  
begabt ein jeglich mensch mit drifaltiger  
wirde. Die erste wirde ist die form sei-

R



nes Göttlichen bildes / welches bild ist  
das corpus, vnd ist ein medium zwis-  
schen der Seelen vnd dem spiritu / vnd  
vnsrer Körper ist von den Elementen/  
vnd fein erden / aber ein retinaculum der  
Elementen vnd des spiritus.

Vnd darnach so schicket Gott der als-  
mechtig durch seine Göttliche barmher-  
zigkeit vnd liebe / so er zu der menschliche  
wirkung hat / einen Engel mit der seelen  
zu der Frawen / so da befruchtet / oder  
schwanger ist mit dem corpore, vnd ist sie  
zornig / so gehet der Engel mit der seelen  
wider hinweg / vnd kumpt darnach vber  
zehnen tag wider / ist die Fraw noch zornig  
oder böser gestalt / so gehet der Engel wi-  
der weg mit der Seelen / vnd kumpt dar-  
nach wider vber zehen tag / welches da ist  
der vierzigst tag ihrer empfangniß des  
Körpers / vñ stürket die Seele in das cor-  
pus der bey einfügung / die Fraw sey  
geschickt oder nicht / vnd durch solche vna-  
freundsamkeit vnd zornigkeit der frawen  
wirdt der selbig mensch in seinem leben  
also



also geschaffen/ das er seiner Seelen fern  
ich ist / denn er füret gemeinlich ein vn  
Gottförsam leben / vnd die seele nimpt  
mit sich den spiritum des luffts / welcher  
da ist das leben des fleisches / vnd der E  
lementischen naturen / in allen volkum  
menen vnd vnuolkummenen dingen / die  
vnder dem himmel sein / vnnnd der selbige  
Geist ist auch in vus / darumb / das wir  
auß den vier Elementen seindt / denn der  
geist der lufft ist das leben vnd der regies  
rer / vnd die behaltenuß der vier Element  
ten / denn ohn den spiritum kan kein ding  
in seinem wesen sein / noch bleiben / vnnnd  
darumb / das die Seele den spiritum be  
greiffet / vnd ihn mit sich in das corpus fü  
ret / das geschicht darumb / daß sie beide  
von einem wesen spiritual in sich beyde  
der müter natur / vnnnd ein ding seind / als  
von Lufft vnd feur / vnnnd darumb / gleich  
vnnnd gleich nimpt eins das ander / vnnnd  
eins ist dem andrn zů willen vnd gehor  
sam zů sein / zů thun vnd zů wissen wo sie  
beide sein wollen / vnd der spiritus ist das

R ij



medium, so die animam vnd corpus zusamen gibt / vnd durch den todt auch wider scheidet / daß der spiritus ist die corruptio vnnnd ist ein Element der lufft / vnnnd des menschen Seel ist von dem edelsten auß allen Elementen / welches da ist das wesen der lufft / dauon die Engel gemacht sein / vnnnd das leben der selbigen das ist von Gott selber / darumb was auß dem himmel kumpt / das kumpt auch wider in den himmel / so fern / das die Seele nicht zu vil dem geist folge / volget sie aber dem zu vil / so bleibt sie sampt dem Geist vnder dem himmel / denn was von Gott vnder den himmel geordiniert ist / das bleibt auch ewigklich vnder dem himmel / denn der geist oder spiritus ist von Gott geordinieret vnder dem himmel zu sein / darumb soll er auch vnder dem himmel bleiben / dann der geist oder spiritus in dem menschen / das ist die seele aller vollkommenen vnnnd vnuolkommenen dingen / die vnder dem himmel sein / vnd der spiritus ist ein freund des corporis, denn  
das



Das corpus spricht / O spiritus, du hast  
mir gebracht ein edle essentiam, Ich hab  
Gott gesehen im Sacrament / durch die  
seele. Dann Gott hat die seelen mit drey  
en krefftien oder potentien begabet. Die  
erste ist die potentia des verstands / Die  
ander ist die potentia der memorien / Die  
dritte potentia ist der wille / vnd dise drey  
krefftien seind in der Seele / vnd die See-  
le ist von disen dreyen / darumb kan der  
Mensch durch die Seele alle heimlich-  
keit vnd verborgene dinge erkennen / vnd  
begreifen in dem menschen / wo sie nicht  
durch das corpus verhindert wirdt / denn  
jhe mehr die krafft des corporis zunimpt  
durch die natürliche speiß / essen vnd trin-  
cken / jhe mehr die verstendnus des Gei-  
stes zerstöret wirdt / vnnd abnimpt / da-  
rumb so spricht der weise Beltenus / du  
solst dein Liecht / das ist / deine seele / in ein  
rein glesern gefeßlein / das ist das corpus /  
das nicht zu oberflüssig gespeiset sey / se-  
hen / so kan die verstendniß die heimlichkei-  
ten vnnd wunderliche werck Gottes be-

R iij



griffen/vnd erkennen/vñ auch begabt Got  
der Almechtig einen jeglichen menschen  
nach seinem verstand/welches dann auch  
mit allwegen essens vnd drinckens schuld  
ist / So der verstand des menschen sub-  
til ist / so mögen sie auch subtile ding be-  
greiffen / ist aber der verstand grob / so be-  
greiffen sie auch darnach sie geschickte  
seind / denn Gott verleihet einem jeden  
Menschen nach seiner Complexion der  
naturen / vñnd gebürig seines verstands/  
vnd nach seinem verdienst / denn das o-  
berste Gestirn bewaget vnser corpora/  
ein jeglichen nach seiner Complexion / der  
selben Complexion der Natur / darnach  
das geschickt ist / durch den geist / denn die  
influentia des himmels arbeiten in dem  
spiritu der menschen.

Denn inn vns Menschen seind zwey-  
erley franckheiten. Die erste franckheyt  
ist in des Menschen eigen spiritu / vñnd  
heissen die geistlichen franckheiten / die  
da von zorn / oder von fantaseyen / oder  
von reu / oder von studieren / oder sonst  
von



von andern bösen abentheuren vnd dergleichen kummen / vnd diß sein frantzheiten des geistes. Die andern frantzheiten seind alle zufellige frantzheiten / welche die Menschen an den Cörpern vberkommen / die da von vil essen vnnnd trincken / oder von böser speiß vnd tranck entspringen / oder von großem hunger vnd durst leiden / von grosser kälte / vnd andere vil gebrechlichkeit des leibs / vnnnd dergleichen leiden / da dem Menschen schwere grosse frantzheiten von kommen.

Darauf ist nun kund vnnnd offenbar / das wir Menschen hie auff erdreich zugleich gut vnnnd böß / in ein stuck geschafften / Darumb wir allzeit wandelbarlich vnd vnbleiblich sein / Aber wann der spiritus vnd die anima in den vier Elementen des Cörpers der menschen dominieren / so ist der mensch gesund / denn in der vnreinigkeit der Elementen ist der todt.

Vnd der Spiritus ist ein heimlicher feind der Anime / darumb sehe ein jeglich mensch wol zu / das der spiritus die anime

R iij



man nicht in die ewige verdammnis vers  
füre / denn der spiritus ist die corruptio  
der seelen / denn er ist auß dem Element  
der lufft / vnd durch ihn kompt die sünde /  
denn der spiritus erwecket die Sünde in  
dem körper / vnd schmehet die seele / Da  
rumb ist der spiritus der ewig todt / dann  
er spricht zu der seelen / ich will dich füren  
zu dem ewigen todt / in das dunckel hauß.  
Darumb so folge der mensch nicht so sehr  
dem geist / dem fleischlichen außwendi  
gen willen / er füret sich anders mit der  
seelen in die helle.

Vnd durch den todt des Menschen  
geschehen drey separationes, die erste ist /  
die separatio der animæ von dem corpus,  
die ander ist separatio des spiritus von  
dem corpore, die dritt ist separatio des  
spiritus von der anima.

Alhie ist ein Frag / ob der spiritus mit  
der anima in den himmel gehen soll / o  
der ob sie alle beide vnder dem Himmel  
bleiben sollen / der spiritus vnnd anima  
thün beide poenitentiam in der grossen  
gewalt



gewalt Gottes / vnnnd die anima wurde  
durch den spiritum gereiniget / vnd wann  
dann die anima gereiniget ist / so steigt  
sie in den Himmel / vnd der spiritus blei-  
bet in medio in der lufft / vnd das corpus  
vnden in der Erden / vnd also kompt jeg-  
lichs wider dahin / daher es ist herkom-  
men / dann der spiritus mag mit der ani-  
ma nicht in den Himmel kommen / dann  
er ist ein Element der Lufft / vnd darumb  
kompt die sünde durch ihn / vnd kein Ele-  
ment noch Sünde kan kommen in den  
Himmel / denn der himmel ist ein quinta  
essentia, oder das fünffte wesen der Ele-  
menten / darumb soll der spiritus vnder  
dem himmel bleiben / vnd zum Jüngsten  
tag so soll die anima vnnnd corpus wider  
ein ding / vnnnd am Jüngsten tag so solle  
das feur in den himmel steigen / vnnnd die  
natur generatiua wirdt von der Erden  
genommen / vnnnd das materialisch feur  
kompt in die helle / Darumb wirdt zum  
Jüngsten tag kein sperma in keinem cor-  
pore sein / vnnnd darumb sollen wir mens-

R v



schen nach dem Jüngsten tag auch nicht  
mehr frucht forbringen / denn die Ele-  
menta seind nicht mehr in ihrem wesen/  
sonder alle in ein clarificierten gecoagu-  
lierten Corpus / als ein Cristal kommen/  
vnd die erden die wir menschen tragen/  
die muß in den himmel kommen / welche  
ein andere form vnd qualitet hat / dann  
die erde der vier Elementen / vnd dar-  
nach soll die Seele zu dem Corpore kom-  
men / sie erfrewen sich mit einander / sie  
bleiben bey einander / dann darumb das  
der spiritus weg ist / so wirdt das Corpus  
clarificiert / vnd nach dem Jüngsten  
tag wirdt darnach ein ander wesen / ein  
ewig leben / vnd wirdt ewig tag/  
vnd in der hellen die ewige  
nacht sein / vnd mit den  
verdampften ist dan  
der tag der ewig-  
lich war / nacht  
worden. 28.

Gott



Gott der Allmechtig wölle vns das  
ewig Liecht mit dem ewigen  
tag / welches Liecht vnd  
tag Got selber ist /  
gnädiglichen  
verleihen /  
Amen / Amen.

Gott allein die Ehr.

Errata.

Fol. II. linea 18. liß der empfindliche.







Getruckt zu Straßburg/durch  
Christian Müller /  
1577.



